


KIFULO KYABUPOPWESHI

KYASALULULWA NA LESA

 Twayai twimaneko pa kimye kyo tubena kukunyika mitwe yetu mu milombelo. Kabiji pano, na mitwe yetu yakunama, kabiji Naketekela mba michima yetu yakunama, ne ayo, Nakumya kana baanga muno bufuku buno bakonsha kutemwa kwibavulukako mu milombelo, ya kintu kimo kyapusanako? Wakonsha kusutulako kuboko kobe, ne kwamba mba, “Lesu, mpai bufuku buno kyo Mbena kukeba.” Aye Nkambo emupeshe.

² Taata Wetu Wamwiulu, pano byo tubena kufwenya ku jije Jitanda ja lusa, konka kulwitabilo, twenda kuya Mulwele; amo Lesu, ne ba Malaika, ne ba Kelubi, kabiji ne jizhita yonse ya Mwiulu bapwila pamo. Mambo Aye waambile mba kechi kyabala wakonsha kuponena panshi kwakubula Taata Wamwiulu kwikiyuka ne. Pano ibyepi Aye kukilapo kuyuka muno muji maaduleendi a bantu bakunyika mitwe yabo, kabiji ne kwita pe Anweba na mambo abya kukabila byapusanako. Taata, talai panshi pa byakukabila bya ba panopantanda bufuku buno, mambo twi bantu bakabila bingi.

³ Kabiji Nalomba, Lesu, namba mambo twapwila pamo muno kabiji tubena kumwesa kwi Anweba lwitabilo lwetu mwi Lesu mumi Ao ukumbula milombelo; twafuma mu ntanda muji babulwa mukanda, wa mu muchima ne matwi, twafumamo amba twikale na bumi bwapusanako, kabiji ne kwikala bumi bwa kwisolola lwitabilo lwetu mwi Anweba. Bufuku buno twasutula maboko etu, ne kwamba mba, “Atweba twakabila.” Lesu Mutemwe, panai mukumbu ku byakukabila byabo.

⁴ Kabiji pano, Taata, twalomba mba Anweba mwitupule bufuku buno mu Kyambo. Twaiya muno na kololwa, ne kumwisha, pakuuba mba tuyuke motwafwainwa kwikela mu jino juba jaleelo; ne kya kuketekela kulutwe, ne kyakuuba. Mambo, twayuka mba Kwiyi kwa Nkambo kujitu pepi, mwaila biyukilo byonse bangauzhi byo baambijile jimo. Tubena kufwenya pepi na kimye, Nkambo, bupokolweshi bwapwijiijika po bukapanwa ku baana Benu. Lesu, lekai, yense, akatanweko, Taata. Kechi mukekalepo nangwa umo ukabulwapo ne. Ao oene mambo otwatainwa muno, Nkambo. Atweba twi mutemwa Anweba, kabiji tubena kweseka kwiningezha ku kyokya kimye.

⁵ Ambai kwi atweba, twikipuzha ne jikwabo, bufuku buno. Kabiji bukai bakolwa. Bonse bakolwa ne bamanyikwa baji mu kishimikwa, twalomba mba Anweba musa kwibabuka, Nkambo; kukijishamo kwi booba baji na byakukabila bya

bumupashi. Twalomba mba Anweba musakupulusha mweo yense walubilamo. Yuzhai waitabila yense na Mupashi Wazhila. Kabiji vuzhaimo bulume ne Ngovu mu baana Benu baitabila. Swishai bibye bintu, Taata. Twaipuzha byavula, mambo Anweba mwitubujile amba lombai, “lombai byavula, lombai bintu bikatampe, byavujisha,” pakuuba mba lusekelo lwetu lwikale lwafikilamo. Kabiji twibilomba mwi Yesu Kilishitu mu Jizhina. Amena.

Ikalaiko.

⁶ Amiwa namona jino ke jishuko jikatampe bufuku buno, pa kubwela jibiji pa uno pulatifomu, pano pa uno sukuulu mukatampe, ku meso abaabo bantu bawama bapwila kuno na kuteleka Mamboawama. Amiwa nalomba lusa lwa Lesa kukwasha kwimubuula bya Bukine monka mo Nayukila Bukine. Aye wakonsha ne luno kunshika kanwa ka muntu, nobe byonka Aye byo akonsha kunshika kanwa ka bokwe. Kabiji inge Nakonsha kweseka kwambapo kiji kyonse kyatama ne kyapusanako ku kyaswa muchima Wanji, milombelo yami ya bukishika ke ino amba Aye akonshe kunshika kanwa kami, amba kechi Nakonsha kwikyamba ne. Mambo, kyakine, Amiwa mbeni kukeba kuya Mwiulu, amiwa; kabiji Amiwa kechi nakonsha kuntanwako ne, kabiji, pa byonse byo, Nakonsha kwikala ntangi wabubela, muntu umo wauba kintu kyabubela. Inge Ne kyuba, ke mambo akuuba mba kechi Nayuka mo kyapusenako ne. Aye Nkambo emupeshe.

⁷ Bino, keesha lukeelo, inge kyo kyaswa muchima wa Lesa, Naimena kwamba pa yuwe mutwe, *Masongola ne Kwikana*. Kabiji twaketekela mba anweba mukeya, ne kuleta mapezulu enu ne bipepala. Kechi tusakwikala kimye kyabaya ne, bino Nasaka kuuba. . . . Akyo kyo kine kintu kyakubwelela kuno, patanshi, mu Indiana, akyo Amiwa kyo ne mulaile. Kabiji Amiwa nkeseka, keesha lukeelo. Inge nabula kwikyuba keesha lukeelo, Amiwa kekyuba keesha bufuku. Bino Amiwa keseka keesha lukeelo, inge Nkambo waswa, kwamba pa yeo mutwe, milanguluko ya masukuulu abiji. Kabiji lekai Lesa etukwashe kuyuka Bukine, kuyukatu Bukine bobuka, pakuuba mba twende mu Bukine ne mu Kyeya. Atweba. . .

⁸ Mwayukatu, twajinga na mulunda mukote wachiluluka. Aye waambile kwi amiwa, waambile mba, “Mulongo Billy,” waambile mba, “Ami—Amiwa kechi keba lukatazho pa mukola ne.” Aye waambile mba, “Amiwa nakeba kwikala na jichikichi mu kuboko kwami. Kabiji umvwe wiso wavuma, Amiwa kechi nkeba lukatazho luji lonse kokwa ne. Amiwa naipwizhe Nkambo, kimye kyapita kunyuma, inge pajipo kintu kimo kyatama, lekai nekyube bulongo ponka pano,” waambile mba, “mambo kukekala mfishi ne kipumpu alwa lukeelo bwato byo bukafika kulubaji lukwabo.” Waambile mba, “Amiwa kechi nkeba kya kukilang’anya kulutwe ne. Amiwa nakeba kuwamisha

byonse bye pa kyonka kino kimye.” Akyo kyo twaishila kuno, kumona byonse bya kukilang’anya kulutwe byawamishiwa, pakuuba mba twakonsha kwenda peulu mu yewa awala.

⁹ Pano, Amiwa kechi nakeba kwamba kwi anweba kimye kyabaya bufuku buno ne, mambo tuji na mpwijilo ibiji keesha. Kabiji pano Amiwa nkafumapo, kuntu kukwabo, ne kuya kukwabo, mpwijilo yamvula.

¹⁰ Bino, pano, mu Buuku wa Mpitulukilo ya mizhilo. Nasaka kutanga kufuma mu kypitala kyabu 16, maveeshi atanshi asatu, a Mpitulukilo ya mizhilo 16:1 kufika pa 3.

Lamai ng’ondo wa Abibi, kabiji mukalamenga kijilo kya lupitailo...kya YEHOPA Lesa wenu: ... mu (wabu foolo) ng’ondo wa Abibi Yehoba Lesa wenu wimufumishe mu—mu kyaalo kya Ijipita bufuku.

Onkao mambo anweba mukataphishe kijilo kwi YEHOPA Lesa wenu, kya mikoko ne kya ba ng’ombe, konkakwa kuntu ko akasalulula YEHOPA kwa kwikazha jizhina janji.

¹¹ Pano, mutwe wami bufuku buno ye: *Kifulo Kyabupopweshi Kyasalululwa Na Lesa.*

Inge mwamona, ng’ondo wa A-b-a-d...-b apo paji, kyalumbulula mba, “Mulombola.” Ng’ondo wa Mulombola mo mo balupukile.

Kabiji kintu kyenye ke kya kuuba mba atweba bufuku buno, nobe bapopweshi bakwa Lesa, mu jino juba jo twikalamo, kabiji twatana milanguluko yapusanapusana yavula ya bantu. Kabiji kikulutu kuji milanguluko yapusanapusana pa kintu kimo, kwikala mepuzho apusanapusana; kwafwainwa kwikala mukumbu umo wakine ku jipuzho jonse jipuzhiwa.

Inge Nakonsha kwipuzha jipuzho, “Kyokika kye?”

“Kyawama,” bakonsha kwamba mba, “desika.”

“Kyo kya byepi?” Mwamona?

¹² Bino, akwa, muntu umo wakonsha kwamba mba, “Kechi desika ne. Ke kipabi.” Kyawama, ke kipabi, bino kasa kiji desika. Mwamona, kwafwainwa kwikala mukumbi wawama ku kyokyo.

Kabiji inge Nakonsha kwipuzha jipuzho pa kintu kiji kyonse, kwafwainwa kwikala mukumbu wakine. Kwafwainwa kwikala kintu kiji pepi nakyo; bino kwafwainwa kwikala wakine, mwine mukumbu ku jipuzho jonse. Nanchi, onkao mambo, jipuzho jonse jiiya mu bumi bwetu, kwafwainwa kwikala wakine, mukumbu wawama.

¹³ Kabiji pano, leelo, tumvwa—twikyumvwa kyambiwa mba, bantu betu bavula mu ntanda leelo. . .

Nobe kwikala mishonale, naenda ng’endo yavula bingi kwabuka tulunga twa meema ne mwaya ntanda, Amiwa

nasambakana na bupopweshi bwavula bingi bwapusanapusana, biji nobe ba Buddha, ne bena Mohammed, ne ba Sikh, ba Jains, kabiji ne-bakwabotu, ba mu bupopweshi bwa pantanda. Kabiji muno mwetu mu United States; kabiji ne byaalo bikwabo bingi, basambakana na bipwilo byetu byapusanapusana, biji nobe bipwilo byetu bya madinominesheni, kutatwila na kitanshi kya Katolika wa ku Loma, kabiji ne ku ba Giliki, ne bikwabotu, kabiji ne—ne misango yapusanapusana, kabiji kuya mu kimye kya. . .onse mankulo a madinominesheni, afika naini aduleendi ne baanapo a byapusanapusana bya madinominesheni aki Polotesitanti.

Pano, pa kimo kimo, mambo, mwakonsha kumona milanguluko yabo, kabiji Amiwa kechi nakonsha kwibapa mambo ne. Kimo kya mubibye kyamba mba akyo kyo kyakine, bobaji na bukine. Kabiji bantu baji mu bibye bipwilo bafwainwa kuketekela kyokyo, mambo abo bebikila kwabo—kwabo kobabena kuya, kifulo kyabo kya Peenape, monka mwaila lufunjisho lwa kyokya kipwilo. Kabiji bapusenamo bingi, kimo ku kikwabo, poso balenga mepuzho afika ku naini aduleendi ne baanapo apusanapusana.

Onkao mambo, byo aaji naini aduleendi ne baanapo mepuzho apusanapusana, kwafwainwa kwikalatu Mukumbu umo wawama. Kabiji Nakonsha kutemwa atweba bufuku buno, byo kiji mba tubena kukeba kuya Kwiulu, ne kukumanyama Nkambo Yesu Ao ye twatemwa, Amiwa nakonsha kutemwa kupalanguzha mu Binembelo mu kukeba kyokyo.

¹⁴ Pano, inge ajo jipuzho ja mu Baibolo, nanchi jafwainwa kwikala na mukumbu wa mu Baibolo. Kechi wafwainwa kufuma mu jibumba ja banabalume ne, kufuma mu lumvwang’ano lwa bupopweshi lumu, nangwa kufuma ku umo ufunjisha, nangwatu kufuma ku dinominesheni umo ne. Wafwainwatu kufuma mu Kinembelo, ako kuji kifulo kya Lesa kyakusambakenapo, kya bupopweshi. Kabiji kine, byo aaji Lesa, kuji kifulo kuntu kumo, Aye po asambekena.

¹⁵ Pano, twatana kuuba mba mu Mpitulukilo ya mizhilo papo, ku ntendekelo, Mosesa ubena kubweluluka kunyuma mu Kinembelo, bintu byo ebabujilepo, Aye byo ebalupwile na kukatampe, kuboko kwakosa, pa kufuma mu Ijipita, kabiji patanshitu wibekajikile.

Abo batelelwe mba “bantu bakwa Lesa” poso byo bafumine mu Ijipita, kabiji nanchi batelelwe mba “kipwilo kya Lesa.” Mambo, kipwilo ke booba bapwila pamo, nangwa, mu bukine, akyo *kipwilo* kyalumbulula mba “booba-baitwa,” ke booba baitwa. Kabiji bafumine mu Ijipita, pakuuba mba bekale kipwilo.

¹⁶ Pano Lesa wibabujile mba, abo byo. . .kasa bakyangye kushimika tempo ne byonse byo baubile ne, “Amiwa kasalulula

kifulo Kyami kya bupopweshi, kabiji Nkabika Jizhina Jami ponka.” Kabiji akya kyo kyonka kifulo Lesa kyo akakonsha kusambakenapo uji yense, ke kyokya kyo asalulula Aye Mwine. Aye wasajile kifulo Kyanji, kabiji akwa Nkoasajile kifulo Kyanji, Aye wabikileko Jizhina Janji, veeleshi wabu 2 papo witubula mba; Aye ukabika Jizhina Janji pa kifulo kyo Asalulwijile bantu amba bamupopwelepo Aye. Pano, kine kintu ke kino, tubena kukeba kutana akya kifulo pokiji.

¹⁷ Na naini aduleendi ne baanapo milanguluko yapusanapusana, byo kyaikala mba twasha bonse bupopweshi bwa buntushi, kabiji kwambatu pa bupopweshi bwa Bwinakilishitu. Akyo, Amiwa njina muchima wa bantushi, inge ne Amiwa kechi nakonsha kuyako na kwamba nabo ne. Bino, baya mungi. Bwinakilishitu bo bonka bupopweshi bwa kine, ke Bwinakilishitu. Kabiji Mbena kwamba kyokyo kechi na mambo akuuba mba Amiwa ne Mwinakilishitu ne; mambo, Naketekela mba akye kya Bukine. Bo bupopweshi bonka buji bulongo.

¹⁸ Amiwa nafikako ku kilende ako mbili utoka ko apipulwa umvwe papita ma awala foolo. Ako, Mohammad, pulisiti mukatampe kabiji—kabiji ntangi wa mumusango wa Kilishitu, wafwajilwe kwikala ngauzhi, bino, Amiwa kechi nazhinauka byo ajinga ne, kwajingatu kulondakana na balongo bena Maccabee. Pakuuba byo ba . . . Aye wafwile. Aye waambile mba ukasanguka jibiji ne kushinda ntanda yonse. Pano, pepi nobe pakupitapo ma awala foolo bapipula bamalonda, kabiji balama mbili utoka pa kilende kyanji. Abo baji, papita myaka tuu sauzande, na kumuketekela mba usa kusanguka ne kushinda ntanda yonse. Bino mwamona . . .

¹⁹ Kabiji mwaya kwi Buddha; Buddha waikele myaka yavula ma aduleendi, papita myaka pepi nobe tweti-fiili aduleendi, lesa wa—wa ku Japan. Kabiji nanchi wajinga wa maana, kijitu pamo nobe Confucius, ne bikwabotu.

Bino bonse bo, mambo . . . batatwile, kabiji ne bakwabotu, bonse bafwile na maana abo, ne kuzhikwa kabiji baji mu kilende.

Pakuuba Bwinakilishitu, bwatatwilwe ne Yesu Kilishitu, kuji kilende mwabula kintu. Aye ye yenka Muntu umo waimene pantanda, wajinga na bumi ne kwamba mba, “Amiwa njina bulume bwa kubika bumi Bwami panshi kabiji ne kwibusangula jibiji.” Kabiji Aye wikyubile. Kabiji Aye uji na bumi ne leelo.

Kabiji twayuka mba Aye uji na bumi, mambo Aye uji ne atweba kabiji wishinikisha Ayemwine kupichila mu biyukilo ne bya kukumya, abya Aye byo alaile mba Ukebyuba pakuuba mba ebimweshe. Kyakuuba mba, nobe Mumbulungwa wa Mujilo awa watangijile baana ba Isalela kupita mungyetu, Uji ne atweba leelo, ne kwikala na kipikichala Kyanji kyafyatulwa; kasa oba

biyukilo ne bya kukumya Aye byo Alaile kuuba mu jino juba, ne kumona byonse Byambo byo Alaile kasa bibena kufikizhiwa jino juba. Onkao mambo, nanchi yonse ntanda ya bantushi ya fumishiwako. Ke Bwinakilishitu!

²⁰ Pano, byo kuji naini aduleendi ne baanapo mepuzho apo Lesa po asambakenya, “Aye ukumanya ba Methodist, nangwa Aye ukumenya mu Baptist, kabiji Aye ukumenya mu *kikye*, ne *kyokya*, kabiji ne *bakwabo*.” Pano, paji jipuzho popo, nanchi kila muntu wakonsha kwikebela jishinda janji mwine ja lupulukilo na moyo ne na kuzakama.

Bino bufuku buno Nasaka kukeba kutana, kabiji ne kushinikisha mu Kinembelo, paji kifulo kyaitabilwa apo Lesa po asambakena ne kupopwelwa ku bantu. Kabiji, inge byokiji, akyo kyo kifulotu Aye po akakumenya.

²¹ Pano, twasenda kikye kibaba kufuma mu Mpitulukilo ya mizhilo. Ke kyambo kya mu ki Ngiliki akyo kiji na bilumbululo byavula, nangwa, kyalumbulula mba, “mizhilo ibiji.” Akye kyambo kya Ngiliki, *Mpitulukilo ya mizhilo*, kyalumbulula mba “mizhilo ibiji yapusana.”

Kabiji abyo Lesa byo aji nabyo, mizhilo ibiji yapusanako. Kabiji umo wa mwiayo ke muzhilo wa lufu, kabiji mukwabo ke muzhilo wa Bumi. Lesa uji na mizhilo ibiji. Pakuuba kumulondela Aye, ne kumwingijila Aye kabiji ne kumupopwela Aye, ke Bumi; Kumukana ke lufu. Muji mizhilo ibiji mwi Lesa.

²² Pano, umo wa iye mizhilo wajinga wayuka... wayukanyikilwe ku ntanda, pa Mutumba wa Sinai. Lesa wapaine muzhilo kwi Mosesa ne Isalela. Kechi kya kwamba mba muzhilo ukebakwasha ne, pakuuba muzhilo wibabujilengatu mba mwi bandengamambo. Poso kufika pa kyokya kimye, kechi bayukile bubi byo buji ne, poso byo baikele na mizhilo. Kechi kwakonsha kwikala mizhilo kwakubula kumanyikwa ne. Muzhilo kechi ke muzhilo ne, kwakubula kumanyikwa. Nanchi, onkao mambo, “Kuzhilulula mizhilo ke bundengamambo, kabiji fweto ya bundengamambo lo lufu.” Nanchi onkao mambo, poso Lesa byo ebalengele mizhilo, mizhilulwila kechi ibatelelwe ne.

Inge kafwako muzhilo kuno waamba mba kechi wakonsha kunyema tweti mailoshi pa awala umo ne, nanchi wakonsha kunyema kukila pa tweti mailoshi pa awala umo. Pakuuba umvwe kuji muzhilo waamba mba kechi wakonsha kwikyuba ne, nanchi kuji muzhilo ne kumanyikwa kuji panyuma.

²³ Pano, lufu, muzhilo wa lufu, yajinga mikambizho yapainwe pa Mutumba wa Sinai, ayo yabujile muntu amba windengamambo. Kabiji, kuzhilulula muzhilo wa Lesa, wafwile. Pakuuba kechi muji lupulukilo mu mizhilo ne. Aya . . . Yajingatu kapokola wafwainwa kukubika mu kaleya; kechi yajinga na kyakukufumishamo ne.

Pano bino Aye wapaine muzhilo mukwabo, awa wajinga pa Mutumba wa Kalvali, apo bubi po bwatongwejlwe mwi Yesu Kilishitu, kabiji ponkapa kumanyikwa kwalipijilwe. Kabiji kwakubula... Kwakubula muzhilo, “bino konka ku bupe ko wapulukila,” konka ku bupe bwa Lesa, monka mu kutongwela jimo kwa Lesa kwakuyukila jimo kwa kwikalako nkobe.

²⁴ Pano twamona iye mizhilo ibiji, Mpitulukilo ya mizhilo, ibena kwamba pa mizhilo ibiji. Kwajinga mizhilo ibiji. Umo wajinga muzhilo wa lufu, kabiji mukwabo muzhilo wa Bumi.

²⁵ Kabiji kwajinga lulayang’ano lubiji lwapainwe ku bantu. Tukamba pe alo mu lukeelo.

Umo wapainwe kwi Adama kasa paji mukambizho, “inge wauba *kikye* kabiji wabula kuuba *kyokya*,” bino awa muzhilo wazhilulwilwe. Adama, Eva bazhilulwile yewa, mu bujimi bwa Edena.

Nanchi Lesa walengele lulayang’ano lwa bubiji, ne kupana yewa kwi Abulahama, kabiji awa muzhilo wajinga wabula mukambizho. “Kechi kyokya kyo wauba ne nangwa kyo ukoba ne;” Aye waambile mba, “Amiwa ne kyuba kala.” Abwa ke bupe. Awa ye muzhilo wa Bumi. Lesa waubijile kyokya Abulahama ne Lukunwa wanji ukamulondela, nkokuuba mba, bonse ba mu Lukunwa wa kwa Abulahama.

Byonka byaamba Baibolo, “Isalela yense ukapuluka,” bino akyo kechi kyalumbulula mba Bayudeya ne. Nobe byonka byaambile Paulo, “Amba Isalela wa bumukachi, nangwa Isalela wa bupangye.” “Pangye,” nobe byo twaambile bufuku bukwapo, bajinga baana bakwa Izaka, monka mu masongola. Pakuuba muzhilo wa Lesa wajinga mwi Kilishitu, ao wajinga Lukunwa Wazhila wakwa Abulahama, amba “konka ku bupe Isalela yense ukapuluka.” Ko kuuba mba, “Bonse baji mwi Kilishitu bakapuluka,” bonse, lulayang’ano lwa bubiji lwa Lesa. Pakuuba byonse bye bintu byajinga bivule bya Kilishitu.

²⁶ Pano monai veeleshi wabu 2. Veeleshi wabu 2 papo mu Mpitulukilo ya mizhilo 16, “Popwelai mukifulo kyo Nasalulula.” Pano wafwainwa kupopwela Lesa, Aye waambile mba, “Mu kifulo kyo Nasalulula,” kechi kyasalulula muntu mukwabo ne, kana, “kyonka kyo Nasalulula.”

Pano, umvwe Lesa wasajile kifulo, kitufwainwa atweba kukeba kyo Aambile pa kikye. Kabiji kiji kwepi? Amiwa nakeba kwikitana, mambo, kyakine, Amiwa mbena kukeba kumupopwela Aye.

Atweba bonse tuji muno, bufuku buno, na kumupopwela Aye. Twaikala muno bufuku buno, nobe ba Methodist, Baptist, Katolika, Bakamonyi ba Yehoba, Sayaasi Wabenakilishitu, ne byonse, bino atweba bonse tubena kukebapo kintu kimo.

Tubena kukeba kuyuka Bukine. Aye Baibolo waamba mba, “Anweba mukebuyuka Bukine, kabiji ne Bukine bukemulengela kwikala bakasuluka.”

Muntu umo, kechi wakonsha kuyuka kyo ubena kuuba ne, obewa kechi wayuka mwakyubila ne poso wayuka mwakwikyubila; obewa kechi wayuka byakuuba ne poso wayuka mwakwikyubila, nobe byobyoy. Obewa wafwainwa kuyuka kyo ubena kuuba kabiji ne mwakwikyubila.

²⁷ Akye kitumweshwa mba Lesa uji na kifulo kyakusambakenapo kya bapopweshi Banji, pa kifulotu kimo. Pa kyokya kifulo, kyonkatu, Lesa usambakenapo na bapopweshi Banji.

²⁸ Kabiji, ne apo, kifulo Aye kyo asalulula kya bapopweshi Banji, Aye waambile mba Ukabikapo Jizhina Janji. Pano twayai tupalanguzhe ne kutana, monka mu Binembelo, kuji kikye kifulo. Kyakine, inge Lesa waambile mba Aye ukabika Jizhina Janji pa kikye kifulo kyo Asalulula kusambakenapo na bantu kabiji ne kupopwela nabo... nangwa abo bapopwela Nanji, nobe byobyoy, amba kiji kuntu kumo mu Baibolo, mambo kyajinga kya mankulo onse.

²⁹ Kabiji aye mukatampe Lesa ubula kwaluka kechi wakonsha kupipula ne. Muntu upipula. Bino wakonsha kubika bumi bobo pa kintu kimo akyo Lesa kyo aambile pa kimye kiji yonse, mambo ke Bukine. Ke Bukine. Mambo, akyo kyo kintutu kyonka kyo Nakonsha kwikala nakyo na luketekelo, ke Baibolo. Mambo, kyambo kya muntu kikankakalwa, pakuuba Lesa ye wakilapo.

Uno mwaka Nakonsha kuyuka byavula kukila byo Nayukile mwaka wapwa. Wafwainwa, ne obewa, pajuba pajuba. Atweba twapelelela, nanchi tuyukilako maana.

Pakuuba Lesa aye kechi uji na mpelo ne. Aye ke wabula mpelo. Kabiji, byo aaji wayayatu, Aye kechi uyukilako maana ne. Aye walumbuluka, kyakutatwilapotu. Kufukula kuji konse kwikala kwaitabilwa.

³⁰ Kabiji jishinda jo aubijilemo Lesa kimye kimo, Aye ukatwajijila na kubila mu jonka ja jishinda, inge ne Aye wikyubijile mo kyatamina byo Ekyubile mu kimye kitanshi. Inge muntu wayishile kwi Lesa ku lupulukilo, mu yenkawa musango Aye ye amutambwijilemo, wafwainwa kutambulwilwa mu yenkawa musango umo. Abyo ibyo. Inge muntu waiya kwi Lesa na mambo a lubuko lwa Bulesa, kabiji Lesa wamuswile mambo a musango umo, muntu walondelapo kwiya, Aye ukamuswa mu musangotu umo, inge ne Aye wikyubijile mo kyatamina byo Aswile muntu mutanshi. Lesa walengele musango Ye akonsha kusambakenamo muntu. Aye walengele musango Wakwikyubilamo, musango Aye mo akeyubila, kabiji akya kyajinga kupichila mu mashi a kitapisho kya mwanamukoko

mu bujimi bwa Edena. Lesa ukyangye, kafwako kimye ne, po ekipipwile.

³¹ Aye wafukwile jishinda ja kupulwishishamo muntu. Tweseka leelo kufunjisha muntu mu kikye; tweseka kwibatwala ku sukuulu, tweseka kwi bafunjisha, tweseka kwibabika mu budinominesheni, tweseka kuuba misango yonse ya bintu bikwabo; kwibatwezhamo, kwibasukenya, kwibatatizhamo, misango ikwabo ijiko, kwibatwezhamo na makalata. Bino wakitwajijilatu, mu musango umo, Lesa usambakana muntu panshi ya Mashi a Mwanamukoko. Mashi o ajinga jishinda jakwa Lesa kufumatu kuntendekelo, kabiji Mashi jo jishinda jakwa Lesa bufuku buno. Kijitu bulongo kwi manyika ne byonse bye bintu, pakuuba lupulukilo lwiyatatu kupichila mu Mashi. Mashi jo jonka jishinda Lesa jo asalulula kupulushishamo muntu, kabiji Aye kechi wakonsha kwijipipula ne.

³² Yoba wajinga na kintu kimo. Aye wayukile mba wajinga waoloka, mambo aye wapaine—wapaine kitapisho akyo Lesa kyo amukebejile.

³³ Pano, twayai tupalanguzhe tumone kikye kifulo byo kiji, kabiji kifulo Aye kyo abikilemo Jizhina Janji. Tusakutana kwepi Aye koabikile Jizhina Janji. Pano, inge twatana Jizhina ja Lesa byojiji kabiji kwepi Aye ko Ejibikile, nanchi twakonsha kwikala na kifulo kyabupopweshi bukiji bukijitu inge twatana kyokyo.

Abye bintu byonse, onkao mambo, kyajinga bivule byabitu bikeya. Mizhilo yonse yajinga kivule kya bintu bikeya.

³⁴ Kijitu pamo nobe, ng'ondo byo aaji kivule kya juba ne. Wingila kwabula juba, kijitu pamo nobe Kipwilo byo kyakonsha kwingila umvwe M-w-a-a-n-a Lesa ufwapo. Pabula Mwaana, Kyeya kicheche, Kipwilo, baitabila, bengijila Lesa na kupana Kyeya pabula Mwaana. Pakuuba umvwe juba jasama, kechi mwakonsha kumona ng'ondo jikwabo ne, mambo wazhika. Kechi kikebewa kyeya kyakyo ne, mambo kitambulatu kyeya kyakyo mu kibese kyabubiji, kufuma ku juba. Bino, nobe mulume ne mukazhi, juba ne ng'ondo byo biji, Kipwilo ne Kilishitu.

³⁵ Pano twatana, mba, abye bintu ke kivule kya Kilishitu. Kitapisho kyonse, kijilo, kabiji ne bintu byonse mu Lulayang'ano Lwakala, byajinga kivule kya Kilishitu; nobe byonka kivule byo kifikila panshi. Pano papo po tusakutana kifulo kyawaina kya bupopweshi, ke kubwela kunyuma mu Lulayang'ano Lwakala ako ko kyapainwe kabiji ne kumona bibye bintu byo byajinga.

³⁶ Pano, inge kivule kyapita panshi, wakonsha kubulang'ana kana mwanamulume, mwanamukazhi, nangwa nyama, nangwa musango yense mo kyaikela, mambo akuuba mba kilenga kivule panshi. Kabiji akya kivule byo kiya na kwipipa, kivule byo kiji kipashang'ano; kabiji kuuba kwaikala kipashang'ano kwakubula akyo kine ne. Onkao mambo, inge kine kintu

kyafwenya pepi ku kifwanyikizho, kifwanyikizho kiminwa ku kine mintu. Kivule ne—ne kine kintu biya pamo, kabiji akyo kyo kikilengela kwikala kine kintu.

Kabiji inge “byonse bintu byakala,” Baibolo waamba mba, “mu Lulayang’ano Lwakala, byajinga bivule bya bintu bikeya,” onkao mambo Kilishitu wajinga kivule kya bintu bikeya.

³⁷ Nanchi twakonsha kumona, kupichila mu bipasha bya Lulayang’ano Lwakala, ako ko Asalulwile kubika Jizhina Janji, kabiji pa...pa kino kimye. Pano, kivule byo kiji...kikilang’anya panshi, Naambile mba, ke kipashang’ano, byo kiji kipasha, nanchi atweba, bapopweshi, ne abo bakonsha kumona bivule bya Lulayang’ano Lwakala kasa biya na kutwela ku kine kintu kya Lupyaa.

³⁸ Pano, bijilo byonse, moba onse azhila, tente yense, mapulanga onse, bintu byonse mu tabbanako, bintu byonse byajinga kipasha kya Kilishitu. Milambo yonse, yonse mizhilo, bintu byonse byajinga kipasha kya Kilishitu. Twapitamoo, kimye pa kimye, ponka pano pa tabbanako.

Nanchi tumona, mu bibye, amba lonse lufunjisho lwa kipwilo, kabiji dinominesheni washala kunyuma kwalepa bingi. Kechi bijipo ne mulwendo, nangwa pachechetu ne. Lufunjisho lonse lwakipwilo, dinominesheni yense, kechi bijimo nangwa pachechetu ne. Kechi pajipo kifulo kyabyo ne.

³⁹ Kafwako nangwa kimo kyapashang’anya nakyo mu Lulayang’ano Lwakala ne, nangwa kuji konse mu Baibolo ne, kwa kipwilo, kana bu umo bwakukajikizha bwa kyamba kya Babela. Akyo kyo kyonka kintu kyapashang’anya bu umo. Mambo, kyatatwile ne Nimulodi, muntu mubi wayile nakukajikizha byaalo byonse bicheche kwiya pa mpuzha imo kabiji ye yuwe kyamba kikatampe. Kyajinga bupopweshi bwa kupopwela, ee kine, bino kechi kyayukanyikwa mu Kyambo kya Lesa ne. Nanchi ako ko kumweka kipasha kya bupopweshi bwa dinominesheni, kyamba kya Babela, mu Lulayang’ano Lwakala. Akyo, abwe bupopweshi bwajinga kyakine bupopweshi, bino kechi ke bupopweshi bwa Kyambo kya Lesa ne.

⁴⁰ Lesa kechi wasalapo kubika Jizhina Janji mu dinominesheni uji yense ne. Nakeba Kinembelo pa kikyee, inge byo kiji. Nayuka bamba mba Aye byo auba, bino Aye kechi waubapo byobyo ne. Aye kechi wakonsha kubika Jizhina Janji pa bifulo byavula ne, mambo Aye waambile mba Wabika Jizhina Janji pa kifulo kimo. Kabiji, akya kifulo kimo, kimo kimo kya dinominesheni wetu bakeba kwamba mba abo kyo kyokya kifulo, bino kyapusanako.

Pakuuba kwepi Aye ko abikile Jizhina Janji?

⁴¹ Pano, kabiji, Aye, Jizhina Janji ye ng’anyi, patanshitu? Twafwainwa (Jizhina) kutuluka Jizhina ja Lesa jojika kasa tukiyanje kutana kifulo kyo Abena kubikamo.

Pano, twatana kuuba mba Aye wajinga na bifulo byavula. Aye watelelwa mba... Aye watelelwe mba "Taata," nakyō ke kifulo. Kabiji Aye watelelwe mba "Mwaana," nakyō ke kifulo. Aye watelelwe mba "Mupashi Wazhila," nakyō ke kifulo. Aye watelelwe mba "Lozi wa ku Shaloni," nakyō ke kifulo. "Kikwibu kya Mukipachiko," ke kifulo, "Ntaanda Wakumakya." "Yehobaye umwena, Jehovah-ye ubuka," sebeni apusana, bilumbululo byavula, mazhina a bukuzhi, kabiji onse ajinga bifulo. Kafwapo nangwa amo ajinga mazhina ne.

Bino Aye uji na Jizhina.

⁴² Byo Akumenye Mosesa, Aye kechi wakijinga na Jizhina ne, kabiji Aye wamubuujile Mosesa mba, "AMIWA YAMI JIIPO." Kabiji inge twamona Yesu panopantanda, kwamba mu Bahebelu kyapitala kyabu 6... Nalomba lulekelo lwa mambo, Yoano Wazhila kyapitala kyabu 6. Aye waambile mba, "AMIWA YAMI JIIPO."

Baambile mba, "Kika, Obewa wi Muntu kechi wakila ne myaka fifite ne, kabiji ke wambe mba Obewa 'wamumwene Abulahama'?"

⁴³ Aye waambile mba, "Kasa akyangye kwikalako Abulahama, AMIWA NSAJIKO." Kabiji "AMIWA NJIPO" wajinga Iye, kipupu kyatemenenga, awa Mumbulungwa wa Mujilo wajinga mu kipupu kiteema mumoba akwa Mosesa, aye "AMIWA YAMI JIIPO."

⁴⁴ Kabiji pano twatana mba Yesu waambile mba, ne aye, "Amiwa naishile mu Jizhina ja Ba Taata, kabiji anweba kechi mwatambulwijile Amiwa ne." Nanchi, Jizhina ja kwa Taata jafwainwa kwikala Yesu. Abyo ibyo. Jizhina ja Taata ke Yesu, mambo Yesu ye wikyambile. "Amiwa senda Jizhina ja Bataata. Amiwa naiya mu Jizhina ja Ba Taata, kabiji anweba kechi mwatambulwijile Amiwa ne." Nanchi, Jizhina Janji jajinga Yesu.

Kabiji Ngabaliela wamutelele Aye mba Yesu, bangauzhi bamutelele Aye mba Yesu, kabiji Aye kine wajinga Yesu. Kusemwa Kwanji kasa kukyangye kwikalako ne, nangwatu ngauzhi wazhila watelele Jizhina Janji mba *Emanwele*, ko kuuba mba, "Lesu tuji nanji." Nanchi, "Lesu wamwekele mu mubiji, pakuuba mba asende bundengamambo bwa bapano pantanda," kabiji, pakuuba byobyoy, Aye wapelwe Jizhina ja Yesu. Nanchi, Yesu jo Jizhina.

Kabiji Jizhina ja bikilwe mu Muntu; kechi kipwilo ne, kechi dinominesheni ne, kechi mafunjisho a bantu ne, kana Muntu! Aye wasalulwile kubika Jizhina Janji mwi Yesu Kilishitu. Pano twatana kuuba mba nanchi Aye waikala kifulo kya Lesu kyabupopweshi, amo Aye mwakumupopwela.

⁴⁵ Saka Akyangye kusemwa ne, Jizhina Janji jatelelwe mba Yesu. Kyajinga kyanema bingi, japainwe kwi Bainanji na

Malaika Ngabaliela, amba Jizhina Janji jikatelwa mba “Yesu, Mwaana wakwa Lesa,” Aye byo ajinga.

⁴⁶ Aje jo tuji najo, nanchi. Aje ijo, bunke bwajo. Jiji, ke Janji bunke, Lesa kifulo kyabupopweshi kyo asalulula. Lesa kifulo, kyo asajile. Lesa wasalululwe kukumanya muntu; kechi kyajinga mu kipwilo ne, kechi mu dinominesheni ne, kechi mu mafunjisho a bantu ne, pakuuba mwi Kilishitu. Akyo kyo kyonka kifulo kya Lesa kyakukumenyapo muntu, kabiji aye wakonsha kupopwela Lesa, monka mwi Kilishitu. Akye kyo kyonka kifulo. Nangwatu wikale Methodist, Baptist, Katolika, Polotesitati, nangwa wikale musango ka, kujitu kifulo kimo akyo kyo mwakonsha kupopwelapo Lesa kyaitabilwa, amo ke mwi Kilishitu.

Loma 8:1, amba, “Pano kechi kuji luzhachisho ku boba banji mwi Kilishitu Yesu ne, aba babula kwenda mu buntushi, kana mu Mupashi.” Ao o Mamboawama.

⁴⁷ Twakonsha kupusana pa mafunjisho a bantu. Twakonsha kupusana pa milanguluko yalengwa-na bantu. Obewa wakonsha kuya ku kipwilo kya Methodist, wafwainwa kwikala Methodist; Baptist, Baptist; Katolika, Katolika. Bino umvwe wabatizhiwa mwi Kilishitu, kabiji waikala membala wa Mubiji Wanji, kechi pajipo lupusano ne. Kibaamba kyapakachi kya lwabano kyakundulwa kabiji wi wakasuluka, mambo uji mwi Kilishitu Yesu. Kabiji obewa upopwela Lesa mu Mupashi ne mu Bukine inge uji mwi Kilishitu Yesu. Ke lunengezho lwa kwa Lesa amba obewa umupopwele Aye mwi Kilishitu Yesu.

⁴⁸ Pano, kafwako kipwilo kya dinominesheni kyakonsha kwamba mba akye kyetu ne, kafwako nangwa umu wakonsha kwamba mba akye kyami ne. Wakonsha kwamba byepi amba akye kyetu? Kuuba kyokyo kintu ke mupashi wa atikilishitu, kikala ke kufumyako kwi Kilishitu; kufumyako kwi Aye. Obewa kechi wakonsha kuuba kyokyo ne. Kilishitu kyo kyonka kifulo Lesa kyo akumenyapo bapopweshi.

⁴⁹ Abo baamba, leelo. Naikalapo kala na bantu ba nkumbula amiwa. Muntu umu wangichile kechi papita kimye kyabaya ne, ku Beaumont, Texas. Aye waambile mba, “Mr. Branham, inge jizhina jobe kechi jiji mu buuku wetu wa kipwilo ne, obewa kuuba waya Mwiulu ne.” Bushe wakonsha kulanguluka pa kyokyo nyi? Kechi wakonsha kuketekela kintu kya byo byo ne. Abo balanguluka mba wafwainwa kwikala wa ku kipwilo kimo inge ne kechi wakonsha kuya Mwiulu ne. Akyo ke kintu kingi. Kuketekela mu kyokyo, ke antikilishitu. Naamba kikye: Inge waketekela yeo mupashi, obewa walubilamo. Akyo ke kiyukilo kyawama kya kwamba mba walubilamo, mambo kibena kufumyako kyokya kyaubile Lesa. Lesa kechi wabikilepo Jizhina Janji mu kipwilo kiji kyonse ne. Aye wi Jibikile mu Mwaana Wanji, Kilishitu Yesu, kimye Aye ne Mwaana Wanji po

baikele ke Umo. Akyo kyo kifulo kituntulu kya bupopweshi. Kafwako kintendekesho kikwabo kyabikwako ne, kafwako jibwe jikwabo ne.

Pe Kilishitu, Jibwe ja nkosa, po Naimana;
Ponse pakwabo pabipa.

Madinominesheni akankakalwa ne kupona, byaalo bikapita, pakuba Aye waikala myaka. Kechi kujipo kifulo kikwabo muntu kyo akonsha kutana ne, pakuuba mba apopwele Lesa, amba Lesa akukumbule, kafwako kifulo ne kanatu mwi Kilishitu Yesu. Akyo kyo kyonka kifulo, kyo kyonka kifulo Lesa kyo asalulwile kubikapo Jizhina Janji, kabiji kyo kyonka kifulo kyo Akumenyapo muntu, mu kupopwela. Anweba mwalubilamo, pakuketekela kintu kikwabo.

⁵⁰ Monai, bijilo byonse sebeni bya Kiyudeya byalamijilwetu pa kifulo kimo. Abo kechi balamine kijilo kimo *papo* kya ba Methodist, kabiji kimo *kokwa* kya ba Baptist, kimo *kokwa* kya ba Presbyterian, kimo kunyuma *kukwe* kya ba Katolika, kabiji kikwabo kya ba Polotesitanti. Byonse bijilo sebeni byalaminiwetu pa kifulo kimo.

⁵¹ Ke kipikichala kyawama bingi papo. Twapichile mu Mankulo Sebeni a Bipwilo, kyamwesheshe mba Lesa walamina onse Mankulo Sebeni a Bipwilo mu Kyambo, mambo kila nkulo ya kipwilo yalupwile lubaji lumo lwa Kyambo, kabiji kimye kyonse byo bekilupwile abo bamwene Kyeya.

Kijitu pamo nobe bantu batatwile kubatizha mwi Yesu mu Jizhina. Baubile byepi? Balengelele dinominesheni kufuma mukikye, kabiji kyafwijile ponkapa. Nanchi Lesa wafuminemo ne kuya mu muntu mukwabo. Aye kechi ukekala mu kimo kya mafunjisho a bantu nangwa a kipwilo ne. Aye kechi ujipo na kimo kya kuuba nakyo ne. Kechi kujipo kintu kyasenduka kwi Lesa ne. Kyambo kya Lesa kyazhila, kechi kyazhilululwa ne. Kilishitu kyo kine kifulo kyapakachi kya bupopweshi kya Lesa. Aye ye Lesa.

⁵² Byonse bijilo sebeni byafwainwa kulaminwa pa kifulo kimo. Anweba kechi mwakonsha kulamina kijilo pa kifulo kiji kyonse ne. Pano abya sebeni, kifulo . . . Abye bijilo sebeni bya mu mwaka byafwainwa kulaminwa pa kifulo kimo. Onkao mambo, Mankulo Sebeni a Bipwilo afuminetu pa kifulo kimo, awa wajinga Kilishitu waambilenga mu onse Mankulo Sebeni a Bipwilo. Abyo kine ibyo. Kipasha, kya Mankulo Sebeni a Bipwilo, bino balengelele madinominesheni.

⁵³ Pano twayai tumone pa kipasha kikwabo mu kimye kyo tuji papo, ko kuuba mba, ke kipasha kya lupitailo, kivule kya Yesu. Twamona papo kitapisho kya mashi, monka mu lufu. Kitapisho kya mashi kyajinga kifulo kya kivule kya Kilishitu. Bushe dinominesheni wakonsha kusumisha mashi; wakonsha kulanguluka mba kipwilo kyasumisha mashi, dinominesheni

wasumisha mashi nyi? Kechi ibyo ne. Kyasendele mashi, kusuma kufuma mu bumi. Kabiji, bumi, Yesu papo waiya mukipasha kya mwanamukoko. Aye mwanamukoko wajinga kipasha kya Kilishitu, kabiji kyajinga kivule kya Kilishitu, mambo Aye wajinga “Mwanamukoko wa Lesa,” ye alumbulwile Yoano, “amba ye ufumya bubi bwa panopantanda.” Twatana mba Yesu waiya na kumweka patoka, muno mu Kulupuka kyapitala kyabu 12.

⁵⁴ Monai, kyajingatu kifulo kimo lufu po lwabujile kufika. Lufu byo lwasakile kupuma ntanda, kwajingatu kifulo kimo; bonse babujile mu kikye bafwile. Kifulo kimotu! Pano, bino kechi kyalumbulula mba kyajingatu nzubo imo ne; bino kwajinga kifulo kimo, apo po paipaiwe mwanamukoko. Apa pajinga mashi a mwanamukoko, malaika walufu kechi wapuminepo ne, mambo kyajinga kifulo kimo Lesa kyo a bikilepo Jizhina Janji. Kabiji awa mwanamukoko watelelwe kunyuma kokwa mba, mwanamukoko. Monai, kyajingatu kifulo kimo kyo abujile kupumapo.

⁵⁵ Kabiji kijitu pamo ne leelo. Kujitu kifulo kimo akyo lufu lwa ku mupashi kechi lwakonsha kufikapo ne, akyo ke Kyambo. Lufu kechi lwakonsha kufikila Kyambo ne, mambo Ke Kyambo kyumi kya Lesa.

Pakuuba inge mwabika Pamo na mafunjisho a bantu, Kyambo kifumako ne kuya kulubaji Lwakyokine. Ki abanya nobe meema kufuma ku manyi. Anweba kechi mwakonsha kwibimvwanga pamo ne. Onkao mambo, mwamona, umvwe lufunjisho lwa bantu lwaiya mu dinominesheni, bonse bayatu na mafunjisho a bantu; ne Kyambo kifwa, kabiji kiya kulutwe na muntu mukwabo ne kuya palutwe Kyabaya. Kitoola bulume, byo Kiya kufuma ku lubingisho, kutokeshiwa, lubatizhilu lwa Mupashi Wazhila, kabiji kyafika ne ku Jipeke! Bushe mwamona jishinda Lesa jo apitamo nyi? Nakuletatu Jizhina Janji, kimye kyonse, kuyatu ne kulutwe mu musangotu umo, mambo Aye ye Kyambo.

Monai, Kuuba kyafwa ne. Akyo Kyambo kya Bumi kechi kyakonsha kufwa ne.

⁵⁶ Monai byo kyalumbuluka, pano. Awa malaika walufu kechi bamukayinye kupuma bantu bafunda bena Ijipita ne. Kechi bamukayinye kupuma bifulo byazhila ne, bishimikwa byakyo bikatampe, bafelo bakyo ne. Nangwa, ba pulisiti ba ntanda ne, malaika kechi bamukayinye kupuma ne. Wakonsheshe kupuma kishimikwa kiji kyonse, kifulo kiji kyonse, muntu uji yense, bino kechi kyapumine pajinga mwanamukoko ne.

Lufu kechi lwakonsha kufikila paji kifulo kyanengezhiwa na Lesa ne, kabiji amwa ke mwi Mwanamukoko.

⁵⁷ Monai, kafwako nangwa...bamukayinye kupuma Isalela nangwa mapulisiti akyo a Kihebelu, kabiji, nangwa

dinominesheni wabo uji yense. Byonse byafwainwa kwikala mwasalululwa na Lesa, kifulo kyanengezhiwa, inge ne lufu lwafika.

⁵⁸ Kipwilo, konsetu ko uji, kyonse kyo walamatako, kechi kindengela amiwa kupusanako ne. Bino, kuji kintu kimo kyo wafwainwa kuyuka, wafwainwa kwikala mwi Kilishitu inge ne obewa wafwa. Obewa kechi wakonsha kwikala pangye ya Aye ne. Kipwilo kyobe kyakonsha kwikalatu bulongo, nobe kishimikwa; lumvwang'ano lobe lwa bupopweshi lwakonsha kwikalatu bulongo, nobe muntu. Pakuuba umvwe wakana Mubiji, aa Mashi, Kyambo kya Yesu Kilishitu, obewa wafwa yekawa mineti ye wikyuba. Ke kifulo kyabupopweshi kyasalululwa na Lesa. Apa Jizhina Janji popo jiji, kyakine. Apa ipo po Asalulwile kubika Jizhina Janji; kechi mu kipwilo ne, kana mu Mwaana, Yesu Kilishitu.

⁵⁹ Monai, bukikizhi bujitu mu kifulo Kyanji kyo asalulula, monka mu mwanamukoko Wanji, kabiji monka mu jizhina ja mwanamukoko.

⁶⁰ Monai, wajinga “mulume” mwanamukoko, mulume, kechi mukazhi ne. Kechi kipwilo ne, mukazhi; pakuuba Jizhina Janji, kechi jizhina ja mukazhi ne. Amwa mo Ayilenga na kukumanya bantu kechi mujizhina ja mukazhi ne, pakuuba mu Jizhina Janji, Aye, Mwanamukoko!

⁶¹ Pano twaamba mba, “Kipwilo, kikatampe, kipwilo kyabulume, kyaubile *bibye* kabiji kyaubile *kyokya*. Kyapita mu mwela upupa. Twavujilako mu kubalwa kwa bantu. Tuji mu manambala akatampe. Twi kipwilo kyabulume. Akyo kyabailako bingi.”

Bino Lesa kechi waambilepo kintu kimo pe mukazhi ne. Aye waambile mba, “Aye.” “Aye,” kyo kifulo kya kusambakenamo, aye Mwanamukoko, kechi kipwilo ne. Kechi jizhina kutazha ku mukazhi ne, pakuuba Jizhina Janji. Aye kechi wabikilepo jizhina ja mukazhi kutu kumo ne. Aye wabikile Jizhina Janji mwi “Aye”!

Oone mambo, “Byonse byo twafwainwa kuuba, nangwa kyambo nangwatu byubilo, twafwainwa kwikyubila kyonse mu Jizhina ja Yesu Kilishitu.” Inge twalomba, twafwainwa kulomba mu Jizhina ja Yesu. Inge twaipuzha kyakukabila, twafwainwa kwipuzha mwi Yesu mu Jizhina. Inge twaenda, twendela mwi Yesu mu Jizhina. Inge twaamba, twambila mwi Yesu mu Jizhina. Inge twabatizha, twafwainwa kubatizha mu Jizhina ja Yesu Kilishitu. Mambo, “Byonse byo tuuba mu kyambo nangwa mu byubilo, byubilai mu Jizhina ja Yesu Kilishitu.”

⁶² Mulunda umo wang'ambijile amiwa kimye kimo, kwisamba pa kikye, waambile mba, “Mulongo Branham, bakazhi bami, Amiwa kechi. . .” Aye waambile mba, “Mukazhi, jizhina janji *Kananga-ne-kananga*.” Aye ke wamwingilo, kapepo waikala ne

muno. Kabiji aye waambile mba, “Mukazhi wami,” waambile mba, “uji na jizhina jami.” Amiwa nsakwambatu mba *Jones*, mambo kechi wajinga *Jones* ne. Aye waambile mba, “Pano, kechi wafwainwa kubuuka kila lukeelokelo, inge watola kipyango ke kwamba mba, ‘Pano Amiwa mbena kupyanga panshi mu jizhina ja *Jones*, kabiji Amiwa ng’ambika bikamba pa byakuvwala mu jizhina ja *Jones*, kabiji Amiwa ng’ambika bikamba pa byakuvwala mu jizhina ja *Jones*.’” Aye waambile mba, “Nalanguka mba kechi wafwainwa kwitanga pa jizhina jiji jonse ne.”

Naambile mba, “Naketekela mba uba.” Abyo ibyo.

Kabiji aye waambile mba, “Kyawama, kika? Aye kechi wafwainwa kwikyamba ne. Bintu byonse byo oba biji mu jizhina ja *Jones*, kyakutatwilapotu.”

⁶³ Naambile mba, “Bino kechi waile mukwakwa na kumutana, ne kwaamba mba, ‘Iya kuno, *Jones* ne.’ Aye waikela, patanshitu, kupichila mu kijilo, kijilo kya masongola, ‘*Jones*.’ Inge kechi kyaubiwe byobyone, anweba mubena kwikala mu bukende. Kabiji inge wabatizhiwa mujishinda jikwabo kechi mu Jizhina ja Yesu Kilishitu ne, ke lubatizhilo lwa bukende, alo lubulwa kutanwa mu Baibolo ne.”

Nanchi, “Kyonse kyo uba mu kyambo ne byubilo, byubilai byonse mu Jizhina ja Yesu.” Panyuma ya kyokyo, kika kyo uuba! Bino patanshi, waikala mu Jizhina Janji.

⁶⁴ Kuji banabakazhi bavula bawama bingi muno mu kishimikwa bufuku buno, kyawama, banabakazhi balunkokelo; bino kujitu umo Mrs. William Branham. Aye ye uya pamo ne amiwa ku nzubo. Aye ye iye mukazhami.

⁶⁵ Kuji bantu bawama bingi mu ntanda, bipwilo byawama; bino kujitu umo Mrs. Yesu Kilishitu, kabiji ao iye Ye abena kunanga. Amo imo muji Jizhina Janji. Ako iko kuji bupopweshi Bwanji, mwi Aye kabiji Ayetu bunke. Akyo kyakine. Oo, ee, mwane. Twatana kyokyo kwikala kyakine.

⁶⁶ Pano, oene mambo, atweba, “Byonse byo tuuba mu kyambo nangwa mu byubilo, twikyubila mu Jizhina ja Yesu Kilishitu.”

“Kechi kujipo jizhina jikwabo japewa mushi ya Mwiulu ja kupulukilamo bantu ne, kanatu Jizhina ja Yesu Kilishitu.” Byubilo, kyapitala kyabu 2, waamba mba, “Mambo kiyukanyikwe kwi anweba. . .” “Kechi kujipo jizhina jikwabo jo bapaana mushi ya Mwiulu amo muntu mo akonsha kupulukila ne, kanatu mu Jizhina ja Yesu Kilishitu.” Amena. Naketekela mba mwikitambula. Mu Jizhina ja Yesu Kilishitu, byonse. . .

Mwiulu Mwalepesha mwatelwa ne Aye, “Kisemi kyonse Mwiulu kyatelwa mba Yesu,” byo byaamba Baibolo, “kabiji kisemi kyonse panopantanda kyatelwa mba Yesu.” Nanchi ajo jo Jizhina jasalwa na Lesa kabiji imo Aye mo Ejibika. Akyo kyo kifulo Kyanji kya bupopweshi, ke mwi Yesu Kilishitu. Pano,

twayuka kyokyo mba byo kiji, kafwako kifulo kikwabo kya kupopwelapo ne kanatu mwi Aye.

⁶⁷ “Kechi kujipo jizhina jikwabo mushi ya Mwiulu japewa ku muntu, mo bafwainwa kupulukila ne.” Janji ke Jizhina ja Lesa ja bukuzhi. Lesa uji na jizhina jatelwa mba Yehoba-ye umwena, Yehoba-ye ubuka. *Yehoba-ye umwena*, “aye Yehoba ye ulekela mambo obe onse.” *Yehoba-ye ubuka*, “aye Yehoba ubuka bikola byenu byonse.” Aye wajinga na bifulo byavula. Bino Aye uji na Jizhina jimo ja bukuzhi, ajo japewa ku mutundu wa muntu, kabiji ajo jo Jizhina ja “Yesu.” Ajo jo Jizhina Janji, Aye jo asalulwile kubikapo. Kwepi Aye ko Ejibikile? Aye Wijibikile mwi Kilishitu.

⁶⁸ Mazhina onse a bipwilo, mafunjisho a bantu, bifulo, ke lufu kwibiketekela. Anweba mubena kuketekela kipwilo kya Methodist kwimutwala Mwiulu, mwalubilamo. Inge ubena kuketekela ba Pentekosito, kipwilo kya Pentekosito kukutwala Mwiulu, obewa walubilamo. Kabiji ba Baptist, Lutheran, Presbyterian, Katolika, ne kipwilo kikwabo; anweba mubena kuketekela jizhina jabo, nangwa bifulo byabo, nangwa mafunjisho abo, obewa walubilamo.

Mambo, obewa kechi wakonsha kupopwela ne kana patanshi waiya mu kifulo kya bupopweshi. Amena. Akyo kyo kyonka kifulo Lesa kyo akumenyapo mupopweshi, ke kifulo Aye kyo asalulwile kubikapo Jizhina Janji. Byomse byashala, kuketekelamo, ke lufu. Aye naye . . .

⁶⁹ Kivule kikwabo kya Yesu papo, Amiwa nekinemba, Kinembelo. Neapo, Aye—Aye waji bukivule papo, “Aye wafwainwa kwikala wabula kaneeneno.” Akya kifulo Aye kyakubikapo Jizhina Janji, awe mwanamukoko wafwainwa kwikala wabula kaneeneno.

Pano, ng’anyi dinominesheni nangwa ntachikilo imo po mwafwainwa kubika kikye; kipwilo ka, Katolika, Polotesitanti, Kiyundeya, nangwa kikale kyamusango ka? Ng’anyi ntachikilo, dinominesheni, yo mwafwainwa kubikapo kikye, “kyabula kaneeneno”? Byonsetu byakanyiwa, kabiji kechi byaswishiwa ne!

Bino kuji kifulo! Aleluya! Akyo kifulo kiji mwi Yesu Kilishitu. Kechi mujipo kaneeneno mwi Aye ne. Kechi mujipo mambo mwi Aye ne.

Anweba kechi mwakonsha kubika kikye pe aye ne. Bonse bo bantu beseka kuuba kyokyo, baamba mba kipwilo kyabo kyabula kaneeneno kabiji ne byonse *bye*. Ke bikotu, bazhilulula-Kyambo, batemwang’ana, kasa bafwa lubaji lumo, bena Laodikiya, mafunjisho abantu, bino kechi Bukine ne. Bino ne Pilato aye mwine, mulwanyi Wanji, waambile mba, “Amiwa kechi natanamo mambo mwi Aye ne.” Wanji Mwine mulwanyi

washimwine mba kechi mujipo mambo mwi Aye ne. Kechi mwakonsha kumuzhachisha na bubi Aye ne.

⁷⁰ Aye waambijile bang'anga ba mu moba Anji mba, "Ng'anyi mwi anweba wakonsha kushiniina Amiwa na bubi? Ng'anyi wakonsha kumweshwa Amiwa mba Nendengambo?"

Mbulai kipwilo kimo kyakonsha kwamba mba kechi baubilepo kintu kimo kyatama ne. Kwamba patota, kechi pajipo nangwa kimo mwiabo ne, kafwako, pakuuba baipayang'ene ne kuuba bintu byonse biji pa kalenda byafwainwa kubiwa, kafwako. Kabiji babwela kebeite abo bene. . . Nanchi kechi ke bifulo bya kusambakenapo kya Lesa kya bupopweshi ne, mu lufunjisho lwa bantu nangwa dinominesheni ne.

⁷¹ Balunda nami, Amiwa kechi nakeba kukozha michima ne, pakuuba Amiwa njina mwingilo wa Mbila, kabiji, aya Mbila ke, "Fumaimo mu bibye bilubo!" Kabiji inge Nempupuzha anweba kufumamo, Amiwa nsakwimutwala kwepi? Nakonsha Amiwa kwimutwala ku Branham Tabernacle nyi? Ne akyotu kiji na lukatazho byonka biji bikwabo byonse.

Pakuuba kujitu kifulo kimo kyo Nakonsha kwimutwalako, ko mwakonsha kwikala na mutende ne kukikizhiwa ku lufu, amo ke mwi Yesu Kilishitu, kifulo kya Lesa kyabupopweshi. Akyo kyo kifulo kyo Mbeni kwi mubuula anweba, bufuku buno, amo Lesa mo abikile Jizhina Janji. Amo Aye moalaile mba Ukakumanya muntu yense utwela momwa, Aye ukapopwela nanji ne kuja nanji, amo ke mwi Kilishitu; kechi mukipwilo nangwa kimo ne, kafwako tabbanako ne.

Pakuuba, mwi Kilishitu, Aye ye Tabbanako wa Lesa. Aye kyo kifulo Lesa kyo ayishilemo, Ayemwine, ne kwikala mwi Aye. "Awe ye Mwaana Wami ye natemwa, monka Amiwa Monamwena lusekelo kwikalamo." Amwa imo Lesa mo aikele, waleta Jizhina Janji ne kwi Jibika pe, Yesu Kilishitu. Onkao mambo, Jizhina Janji jabikilwe mu Muntu, Mwaana Wanji, Yesu Kilishitu, mwi Aye moaikele Ayemwine, kabiji mu yewa Tabbanako.

Mwepi, mu kipasha, Yelusalema wakala, bijilo byakala, tepo wakala, byajinga bipasha; bwishi byo bwatwelele, mu juba jikwachi po jatwelele, ja lulayang'ano, kabiji jaikele panshi, kabiji Jiwi ja kwa Lesa jaumvwanikile kufuma mukachi.

Nanchi byo jaumvwanikile Jiwi ja Lesa, kwiya mukachi ka Tabbanako, Yesu Kilishitu; ao, mu Lwakala (ku mubiji) kyajinga kipasha kabiji ne kivule kya Lupya. Kabiji byo Aishile mwi Kilishitu, Aye waambile mba, "Awe ye Mwaana Wami ye Natemwa, Monka Monamwena lusekelo kwikalamo. Kabiji Amiwa kasalulula kifulo po Nkabika Jizhina Jami, kabiji imo Amiwa mo kasambekena muntu, kabiji imo Amiwa mo kapopwela." Lesa wasalulwile kifulo; kechi mu kipwilo kya dinominesheni ne, pakuuba mwi Yesu Kilishitu. Ee, mwane.

⁷² Aye wafwainwa kwikala “wabula kaneeneno,” monka mo Naambijile. Kafwako dinominesheni wakonsha kwitumbijika byo byo ne. Umvwe bauba; ke ba antikilishitu.

⁷³ Pano twatana kuuba mba, monai kivule Kyanji jibiji. Aye—aye mwanamukoko wafwainwa kulamiwa. Pano, akye kitanwa mu Kulupuka 12, inge mubena kwikinemba, Kulupuka 12:3 kufika pa 6. Awa mwanamukoko wafwainwa kulamwa pa mooba foolo, pakuuba mba akeseke, ne kumona mba kana wafikilamo kwikala kitapisho. Wafwainwa kusendwa, ne kwesekwa jikwabo ne jikwabo, pa mooba foolo, kumona kana uji na kaneeneno, kumona kana kujipo misongo iji yonse mwi aye, kumona kana pajipo kintu kimo kyatama na mwanamukoko. Wafwainwa kulamwa kufika pa mooba foolo.

⁷⁴ Pano monai. Anweba bamo mwakonsha kulanguluka mba aa ajinga acheche, waipailwe pa jabufotiini. Bino, vulukai, bakwachile mwanamukoko pa juba jabu teni ja ng’ondo, kabiji ne ku mwipaya pa juba jabufotiini ja ng’ondo, monai, ao walaminwe pa mooba foolo.

⁷⁵ Pano, Yesu, Jizhina ja Lesa, Mwanamukoko, waile mu Yelusalema kabiji kechi wafuminemo jibiji ne poso panyuma ya lufu Lwanji, kuzhikwa, ne kusanguka. Aye walaminwe ku bakajimbuluzhi pa mooba foolo ne mafuku foolo. Kyajinga kipasha kyalumbuluka bingi kya Mwanamukoko, walaminwe pa mooba foolo. Apa bino Pilato po aambile mba, “Amiwa kechi namonamo mambo mwi Aye ne.”

⁷⁶ Kivule kikwabo Kyanji, kafwako nangwa kikupa kimo mwi Aye kyafwainwa kumokoka ne, akyo kyajinga kyalumbuluka, byo babujile kwikyuba. Pa kwipaya kitapisho, kechi bafwainwa kumokola kikupa ne. Inge kyaikala byo byo, ke kumukana. Kabiji banengezhezhe nsondo kunyuma wa kumokaulako bikupa ku maulu akwa Kilishitu, po baambile mba, “Aye wafwa kala.” Abo baanshile ku lubaji Lwanji ne kutana Mashi kabiji ne meema.

⁷⁷ Monai jibiji kintu kikwabo kikatampe papo. Amiwa kechi nakonsha kwikitoloka, mambo Aye waimejilweko mu milambo, mulambo wabunga.

Navuluka kimye kimo bajinga na sukuulu, mu Baibolo, watelwa mba sukuulu wa bangauzhi, kabiji wajinga sukuulu. Kabiji twatana mba Elaija waile ku yewa sukuulu juba jimo, kabiji baambile mba, “Atweba. . .” Abo bamulombelele mba afumeko, baambile mba, “Inge wikale kuno, bintu byoloka bingi.” Nanchi bamukebelenga mba afumepo.

Kabiji bayile na kumusendela kajo ka mulajilo. Kabiji jibumba ja mapulisiti jayile, nangwa bangauzhi, na kusenda kunde, pakuuba mba bamunengezhezhe kajo ka mulajilo. Kabiji byo bekyubile, babungizhe epulo mukatampe wayula; kabiji byo babwelele, byajinga bipangwa byamungye, byajinga bulembe, kabiji be bitaile mu mwipika. Kabiji mipika yatatwile kubila,

ne abo, muntu umo, waambile mba, “Nangwa byonkabyo, muji lufu mu mwipika. Bino kechi twakonsha kwibija ne.”

Kabiji Elaija waambile mba, “Ndetelepo mukuno umo wa kajo.” Kabiji aye watolele aka kajo ne kwikataya mu mwipika, kabiji waambile mba, “Jai. Awa mwipika wabukwa.”

⁷⁸ Mulambo wabunga wajinga Kilishitu. Kya kupelako kyajingatu pamo, kabiji bunga bonse bwapelelwetu musango umo, bunga bwa mulambo. Kyamweshenga mba Aye ye Lubuko. Aye wapingakenye, kabiji wafumyapo lufu, ne kubikapo Bumi; monka mu mizhilo ibiji. Aleluya! Kuji lufu, kifulo kimo; inge Kilishitu waiya, Bumi bwiya. Aye ujitu pamo keesha, leelo, ne myaka yonse. Kabiji apa pajinga lufu, paishile Bumi, mambo Kilishitu waletwamo, mulambo wabunga.

⁷⁹ Lwakonsha kwikala lufunjisho lwabaya bingi inge twakonsha kwikala na kimye kyabaya kya kwibilondolola! Pano monai, kafwako nangwa kyambo kya kivule kyafwainwa ku kakalwa ne. Kafwako nangwa kyambo kimo kyakakelwe ne, kya mu bivule. Bintu byonse byafikijilemotu bulongo.

Aye kyo kifulo kyasalululwa na Lesa kya bupopweshi, kabiji Jizhina ja Lesa japewa kwi Aye. Aye kyo kifulo kya Lesa kya bupopweshi, kabiji Jizhina ja Lesa japewa kwi Aye. Aye ye Kyambo kya Lesa, kabiji Aye ye Jizhina ja Lesa. Aye uji byonse bibiji Kyambo kya Lesa kabiji jo Jizhina ja Lesa. “Aye wajinga Kyambo kya alulwa ke muntu.” Aye wajinga Kyambo kya Lesa, Mwanamukoko wakwa Lesa, Jizhina ja Lesa, kabiji wajinga Lesa. Abyo byo Ajinga, kyasalululwa kabiji kyo kyonka kifulo kya bupopweshi kya Lesa.

⁸⁰ Kabiji Lesa waakana kifulo kikwabo kyapusanako na Yesu Kilishitu; kuuba mwa mupopwela Aye kuji konse ne. Aye waambile mba, “Byatu byo bampopwela Amiwa, byo bafunjisha Mafunjisho a mikambizho ya bantu.” Leelo tuji na mafunjisho a bantu, mafunjisho a kipwilo, kabiji ne byonsetu, bifunjisha mba *aje* jo jishinda kabiji mba *aje* jo jishinda.

Kabiji Yesu waambile mba, “Amiwa ne Jishinda, Bukine, kabiji ne Bumi, kabiji kafwako muntu wa kwiya kwi Lesa ne kanatu kupichila mwi Amiwa.” Mu byambo bikwabo, “Amiwa ne Kibelo kya kujitanga. Bonse bashala ke bakapondo.” Aye jo jonkatu ja kwishilamo. Aye ye Kibelo. Aye ye Jishinda, Bukine, ne Bumi, byonse bijiko; kyo kyonka kibelo, kyo kyonka kifulo, bo bonka bupopweshi, jo jonka Jizhina.

Bintu byonse byakaswatu kwi Yesu Kilishitu. Lonse Lulayang’ano Lwakala lwakaswa kwi Aye. Alwa Lulayang’ano Lupya lwakaswa kwi Aye. Kabiji Kipwilo leelo kyakaswa kwi Aye, monka mu Kyambo kya mikambizho Yanji. Kechi kujipo kifulo kikwabo ne, nangwa Jizhina jikwabo ne, nangwa kuji konse ne, ako Lesa ko alaile kusambakenapo na muntu ne;

monkatu mwi Yesu Kilishitu, kifulo Kyanji kyasalululwa kya bupopweshi.

⁸¹ Monai, Lesa walaile kukumanya bapopweshi Banji pa kyokakye kifulo, kabiji ne kikyeye ke kya kusalulula Aye Mwine; kechi kya kwisalulwila atweba bene ne, kechi kya kwilangulukila atweba bene ne; kana kya kulanguluka Kwanji, kusalulula Kwanji. Kabiji kyo kyafwainwa kwikala kifulo Aye mo akonsha kubika Jizhina Janji, mo asalulwile Aye. Nanchi twatana kuuba mba Jizhina Janji mo jajinga, kyo asalulwile Aye, kya mwaila kusalulula Kwanji Aye mwine.

⁸² Pano byo twatana kifulo kyo asalululwe Aye kya kubikamo Jizhina Janji, ko kuuba mba, mwi Kilishitu Yesu, kabiji kechi pajipo kifulo kikwabo ne, nangwa jizhina jikwabo ne, anweba mwatondwa pa kyokyo nyi? Ambai mba, “Amena.” [Kipwilo kyaamba mba, “Amena.”—Waku.] Pano, kine kintu ke kino, inge twatana kuji kifulo. . . Kifulo kya bupopweshi kikwabo kechi kyaitabilwa ne, kanatu mwi Kilishitu.

Obewa wakonsha kulapila, wakonsha kuuba kyokya, bino obewa ukyangye kutatula kupopwela ne. Obewa ubena kukipuzha kulekelwa mambo. Petelo waambile mba. . .

Pa Juba ja Pentekositi, byo bebamwene bonse nakwamba mu jimi, kabiji ne biyukilo bikatampe ne byakukumya kasa byubiwa, batatwile kuseka, byo kyaubile kipwilo, ne kwamba mba, “Abo bantu bapendwa binyu byakatataka. Babena kuuba nobe bantu bapendwa. Aye. . .” Maliya kisungu, bonsetu, bajinga pamo, aduleendi tweeti ba mwiabo. Kabiji batelengelenga nobe bantu batoma, ne kwamba mujimi, ne bya kuuba. Baambile mba, “Abo bantu bapendwa waini wakatataka.”

⁸³ Pakuuba Petelo, waimene, ne kwamba mba, “Balongo ne batemwe, abo bantu kechi bapendwa waini wakatataka ne, mambo juba jikijitu ja lukeelo. Pakuuba kino kyo kyokya kyaambile ngauzhi wa Lesa Yowela, ‘Kabiji kikeya kufikizhiwa mu moba akapelako, byo byaamba Lesa, Amiwa nketulwila Mupashi Wami pa bantu bonse; baana benu babalume ne babakazhi bakaulanga; Nketulwila Mupashi Wami pa bakalume ne pa bazha Bami. Amiwa nkamweshi biyukilo mwiulu, ne pantanda; mujilo, mimbulungwa ya mujilo, ne luuya lwa bwishi. Kikeya kufikizhiwa mba, Juba jikatampe ne jilengesha moyo ja Yehoba kasa jikyangye kufika, kabiji bonse baketa pa Jizhina ja Nkambo bakapuluka.’”

⁸⁴ Byo baumwine bibye, ne michima ibapile munda, ne kwamba mba, “Balongo ne batemwe, tube byepi?”

⁸⁵ Petelo waambile mba, “Lapilai, anweba bonse, kabiji ne kubatizhiwa mu Jizhina ja Yesu Kilishitu mululekelo lwa mambo enu, kabiji mukatambula wabupetu Mupashi Wazhila.

Mambo mulaye ye wa bisemi byonse bya kulutwe.” Pano twatana kuuba mba.

⁸⁶ Pano twakeba kumona byotutwela *mwi* Aye. Pano tutwela byepi mu kikye kifulo kya bupopweshi? Kolinda Mutanshi 12 wikikajika, mambo, “Konko ku Mupashi umo!” Kechi ku kipwilo kimo ne, kechi ku lufunjisho lwa bantu ne, kechi ku kafunga umo ne, kechi ku bishopu umo ne, kechi ku pulisiti umo ne. Bino, “Konka ku Mupashi Wazhila umo atweba bonse twabatizhiwa mu Mubiji umo,” ao ye Mubiji wa Yesu Kilishitu, kabiji yense wafwainwa kutolako lubaji ku bupe bonse buji mu Mubiji. Ee, mwane! Kechi kwinungako ne, kechi kupituluka mu mafunjisho a bantu ne, kafwako bya ku mpoopa ne, kulekelelako, kwi imuna mu maboko ne, kabiji kafwako kintu kikwabo ne. Bino, monka mu Kusemwa atweba twabatizhiwa mu Mubiji wa Yesu Kilishitu! Amena. “Konka ku Mupashi Wazhila umo atweba bonse twabatizhiwa mu Mubiji umo.”

⁸⁷ Kabiji awa Mubiji ye ng’anyi? “Mu ntendekelo mwajinga Kyambo, ne kyokya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kyamwekele ke muntu ne kwikala wayikele muno mwetu.” Twakonsha kwikala byepi mu yewa Mubiji kabiji twakanapo Kyambo kimo Kyakyo, nangwa Kwikibika kuntu kumo kungi kyakuuba mba kechi Kijipo ne mu Mubiji ne? Twakonsha kwi kyuba byepi? Kifulo kyasalululwa na Lesa!

⁸⁸ Monai, kabiji umvwe kine mwabatizhiwa mwi Aye, bukamonyi bwakine ke bwakuuba mba obewa wakonsha kumuketekela Aye, ye Kyambo.

Wakonsha kwikala byepi lubaji Lwanji kabiji wabwela wamukana Aye? Nakonsha Kukana byepi kuboko kwami kasa kuji kuboko kwami? Inge kuji. . . Inge Nauba kyokyo, pajipo kintu kimo kyatama ku lubaji lwami. Kabiji Amiwa nakonsha byepi? Inge muji kintu kimo kyatama mwi amiwa, kukana mba kechi kuboko kwami ne, kukana mba kechi kuulu kwami ne, kujipo kintu kimo kyatama ku bumupashi bwa waitabila ukana Kyambo kyonse kyo Lesa kyo aambile ne kulaya. Pajipo kintu kimo kyatama ku bumupashi bwa yewa-watelwa mba waitabila.

⁸⁹ Obewa kechi wakonsha kukana kisopelo kimo Kyanji ne, mambo obewa waikala ke lubaji lwa kyonka kya kintu. Obewa wi lubaji Lwanji mambo obewa wabatizhiwa mwi Aye; monka, mu Mupashi Wazhila waletwa mu Mubiji wa Yesu Kilishitu. Ke kintu kyawama bingi!

⁹⁰ Lesa wajinga na kifulo kimo Aye kyo—Aye kyo akumenyepo Abulahama, kabiji konkakwa Abulahama ko apopwejile. Kupita mu Lulayang’ano lonse!

Kabiji Kyambo Kyanji kyalailwe kikalumbululwa mwi obewa, ne Aye. Bushe mwikiteleka nyi? Akya Kyambo kyo Alaile kufikizha mu juba jo mwaikalamo na bumi: obewa ukekala

kalata ya Lesa, itangwa ku bantu bonse. Kechi momwa mo wambila ne, kana momwa mubila Lesa kupichila mwi obewa, kikamba na jwi jikatampe kukila kyo wamba. Lesa waambile mba, “Abye biyukilo bikebalondelanga baitabila.” Akyo kyamba kupichila mwi obewa.

⁹¹ Aye waambile mambo a ino nkulo, bintu byafwainwa kwikalako kino kimye. Baitabila ba kino kimye bafwainwa kuketekela Kikye, abya byo Alaile leelo. Kijitu pamo nobe byo baishile mu bwato, pakuuba mba bapuluke; kulupuka mu Ijipita pakuuba mba bapuluke; baishile mwi Kilishitu, pakuuba mba bapuluke, kutwela mu Kyambo kya Mbila, amba Aye ujitu pamo keesha, leelo, ne myaka yonse.

⁹² Mutwela byepi mwi Akyo? Monka mu lubatizhilo! Lubatizhilo lwa byepi, meema? Monka mu Mupashi Wazhila! “Mupashi Umo, atweba bonse twabatizhiwa mu yuwe Mubiji umo.”

⁹³ Kabiji Kyambo Kyanji kyalailwa, Aye kechi ukooba ne. . . Obewa kechi Ukekilumbulula ne. Aye Ukekilumbulula kupichila mwi obewa; abya byo ubena kuuba, abya Aye byo alaile kuuba. Akyo Kipwilo kimulondela Aye kikekala kyamupasha bingi Aye poso bantu bakayuke.

Monai pe Petelo ne Yoano byo baipuzhiwe pa kubuka mwanamulume pa kibelo kyatelwa mba Kyabuya. Baambile mba, “Bayukile mba,” aba ba mapulisiti, “amba bajinga bonse babula kuyuka kabiji banabalume babula kufunda,” bino abo bamwene mba bajinga ne Yesu. Mambo, (kika?) baubilenga bintu byo aubile Aye.

⁹⁴ Aye wafwainwa kwikala na mwingilo uba Shanji. Kabiji ne leelo kyafwainwa kwikalatu pamo.

⁹⁵ Pano, vulukai, Aye ujitu pamo keesha, leelo, ne myaka yonse; mambo Lesa ukukumanya obewa mwi Aye, kyo kyonka kifulo kijiko; mambo apa ipo Aye po asala kubikako Jizhina Janji, mwi Yesu. “Yesu” ke Jizhina ja Lesa. Vulukai, Taata, Mwaana, Mupashi Wazhila, ke bifulo bya ku Jizhina ja “Yesu Kilishitu.”

⁹⁶ Mateo Byoaabile mba, “Onkao mambo yainga, na kwibasambisha ba mu mikoka yonse ya bantu, ne kwibatizha mu Jizhina ja Taata, ja Mwaana, ne ja Mupashi Wazhila.”

Byo bekilumbulwila mungi leelo, ne kwamba mba, “Mu jizhina ja Taata, jizhina ja Mwaana, jizhina ja Mupashi Wazhila.” Kechi kyanembwa ne kunembwa ne. Kiji mba, “Mu Jizhina,” jimotu, “ja Taata, Mwaana, Mupashi Wazhila.” *Taata* kechi jizhina ne, *Mwaana* kechi jizhina ne, *Mupashi Wazhila* kechi jizhina ne; ke kifulo.

Pakupitapo moba teni, Petelo waimene ne kwamba mba, “Lapilai, anweba bonse, ne ku batizhiwa mu Jizhina ja Yesu Kilishitu.” Nanchi aye waubile kyo Babujile ku mubuula mba

obe nenyi? Aye waubile kyo Bamubujile mba obe. Aja Jizhina ja Taata, Mwaana, ne Mupashi Wazhila ke “Nkambo Yesu Kilishitu.” Muntu yense mu Lulayang’ano Lupya wabatizhilwe mu Jizhina ja Nkambo Yesu Kilishitu.

⁹⁷ Kafwako nangwa muntu umo mu Baibolo wa batizhiwe mu bifulo bya Taata, Mwaana, Mupashi Wazhila. Akyo kechi kyaikeleko ne posotu kimye kya mafunjisho a bantu a ku Nikeya a bikilweko ku Nikeya, Loma. Wajinga mukambizho wa kipwilo kya Katolika, kyatatwile, ne kwikajikwa kintu kimo, mu katekizimu. Amiwa njinakyo, abyo ibyo, *Binshinka Bya Lwitablo Lwetu*, kabiji ne bikwabotu, akyo kine ke lufunjisho lwa Katolika wa ku Loma. Bakemubuula mba kechi biji mu Baibolo ne; bino abo baamba mba baji na ngovu ya kupipula Byambo, inge bakeba mba boobe, mambo akwa papa. Amiwa ne kipachikile.

Yesu Kilishitu ujitu pamo keesha, leelo, ne myaka yonse. “Kabiji yense wa kufumyako Kyambo kimo mu yuwe Baibolo,” byaambile Yesu, “nangwa kubikako kyambo kimo mu Kikye, lubaji lwanji lukafumishiwamo mu Buuku wa Bumi.” Kyambo Kimo; kechi mukuku umo wa byambo ne, nangwatu kibese kya mukuku ne, pakuuba Kyambo kimo! “Yense wakufumyako Kyambo kimo . . .”

⁹⁸ Mu ntendekelo, Lesa wapaine bukikizhi ku bantu Banji na Kyambo Kyanji. Kyambo Kimotu, kyatutululwa mungi, kyaetelele lufu luji lonse, kikola kyonse kya muchima, bulanda buji bonse. Eva, aye kechi wazhilulwile mukuku yense wa byambo ne; aye wazhilulwile Kyambo kimo. Kimye Yesu kyo aishile pakachi ka Buuku . . . Akwa kyajinga Buuku mutanshi.

Kimye Yesu byo aishile pakanchi ka Buuku, Aye waambile mbaka? “Kyanembwa mba muntu kechi ukeekela ku kajo konka ne, kana ku Kyambo kyonse kifuma mukanwa kakwa Lesa.”

Mu Buuku wapelako, Lumwekesho kyapitala kyabu 22, veeleshi wabu 18, lonka lubaji lwapelako lwa Baibolo, Yesu waamba Aye mwine, amba, “Naamba namba muntu yense ufumyako Kyambo kimo mu yuwe Buuku, nangwa kubikapo kyambo kimo Kwiako, lubaji lwanji lukafumishiwamo mu Buuku wa Bumi,” mambo aye ke ngauzhi wabubela kabiji watwala bantu mungi, kabiji mashi abo akakebelwa ku maboko anji, mambo a kuuba kyokyo.

⁹⁹ Twafwainwa kulama akya kifulo kimo kya bupopweshi, ao ye, Yesu Kilishitu Kyambo, ujitu pamo keesha, leelo, ne myaka yonse. Amena. Kijitu bulongo. Vulukai, kechi kujipo kifulo kikwabo kyakusambakenapo na popwela ne, kafwako kifulo ne. Lesa Wikisajile.

¹⁰⁰ Yoano, kwiine kunyuma kokwa pa mupaka wa Lulayang’ano Lupya ne Lwakala. Telekeshai bulongo pano. Monai bulongo. Yoano, awa mpungu mukatampe, wayishile kasa abena

kutumbuka kufuma mu mungye juba jimo, byapi byanji bikatampe byakumbene. Aye waambwile kyeya ku kitulu kya Yondano, ngauzhi mpungu mukatampe wajinga pakachi ka Lulayang'ano Lwakala ne Lupya, kabiji wibechile kufuma ku kilujo ne ku kipiko. Aye waichilenga juba ja lulapilo.

Ako kwaishile Bafaliseo ne Basanduseya; aye waambile mba, "Kechi mwafwainwa kwamba mwi anweba bene mba, 'Atweba tunji na Abulahama shetu ne,' mambo Nemubula mba Lesa wakosha kwalula ao mabwe ke baana ba kwa Abulahama." Oo, ami!

Byo atatwile ku kusakanya Mamboawama anji, ne kwamba mba, "Mwaimana mukachi kenu Umo, Ao anweba ye mwabula kuyuka ne. Amiwa kyangye kukimuyuka Aye ne, pakuuba Amiwa Nkamuyuka byo akeya Aye. Amiwa kechi nafikilamo kukasulula kwabilo Yanji ne. Pakuuba Aye ukemubatizha na Mupashi Wazhila ne na Mujilo. Kabiji Kyanji kyakupupushilako kiji mu kuboko Kwanji; Aye ukapyanga bulongo kipujilo Kyanji, kabiji Aye ukasoka makuzhi na Mujilo ubula kuzhima."

¹⁰¹ Awa mpungu mukatampe wa Mamboawama wajinga kokwa, byo abijikile bya kuchinisha byanji bikatampe. Kabiji biswaswa byafuminemo, nangwa Helonda, wajinga mfumu pa kyokya kimye, witumbijikile aye mwine, wasongola muka mulongo wanji. Kabiji langulukai awa mpungu mukatampe wa Mamboawama waikala byobya kabiji wazhindamatu pa kyabyobya?

Bamo ba mwi abo baambile mba, "Kechi wakonsha kusapwila pa masongola ne kwikana ne, Yoano, mambo Helonda waikala popa."

¹⁰² Aye wayile monka mukilungi kyanji ne kumwambila mba, "Kechi kyaswishiwa anweba kwikala nanji ne." Ibyo!

Kika, aye, wajinga iye? Aye wajinga mpungu wafuma mungye. Aye kechi wafunjishiwe mu bya mooyo ne bya kuchinisha, bya madinominesheni ne. Bino aye wafunjishiwe na bulume bwa Lesa Wabulume bonse, pakuuba mba ayuke bijiko. Aye wayukile kiyukilo kya bu Mesiyasa.

Alaluya! Akye kyambo kyalumbulula mba, "Lesu wetu atumbijikwe!" Kumvwa moyo ne. Amiwa kechi nakozhapo muntu ne. Amiwa kechi njipo na kisangajimbwe ne. Amiwa nayuka po Naimana.

Oo, inge Nalanguluka pe aye, awa mpungu mukatampe watumbukilenga kokwa ne kwikala panshi! Aye waambile mba, "Amiwa nkamuyuka Aye byo Akeya."

¹⁰³ Juba jimo waimene byobya, kasa abena kusapwila. Bang'anga bajinga kulubaji lukwabo, waambile mba, "Anweba mwalanguluka mba kukeya kimye kitapisho kya pajuba pajuba po kikafumishiwapo; awe tepo mukatampe ye twashimika,

kabiji ne mwingilo yense yetwaingila, atweba dinominesheni mukatampe?”

Aye waambile mba, “Kukeya kimye byonse bye bakebifumyapo.”

“Kuuba kyaikala byobyo ne. Obewa wi ngauzhi wabubela!”

¹⁰⁴ Kabiji aye wakeketele. Waambile mba, “Talai, awa Uji popa! Kuji kifulo kyasalululwa na Lesa. Awa ye Mwanamukoko, Mwanamukoko wakine ao ufumya bundengamambo bwa ino ntanda.” Aye kechi waambile mba, “Awe wiya Methodist, awe wiya Baptist, nangwa Katolika ne.” Aye waambile mba, “Awa wiya Mwanamukoko wa Lesa ye ufumya bundengamambo bwa ba panopantanda.”

Kyokyo kifo kya mutende kijiko ke muyewa Mwanamukoko wa Lesa. Mwi Aye bunke mo muji lupulukilo; kechi mu kipwilo kiji kyonse ne, mu lufunjisho lwa bantu ne, nangwa bantu baji bonse ne, taata uji yense, maama uji yense, uji yense muntu wazhila, nangwa kafwapo kintu kikwabo ne, kifulo kyazhila. Kiji mwi Lesa Wazhila, aye Nkambo Yesu Kilishitu, amo Lesa mo abikile Jizhina Janji mu Muntu, ja bukuzhi, Ao walipijile mutengo wa atweba bandengamambo. Akya kyo kyonka kifulo muji lupulukilo. Aja jo Jibwe Amiwa jo naimanapo.

¹⁰⁵ Yoano wamuyukile Aye. Aye waambile mba, “Amiwa kechi na Muyukile byo Namumwene Aye kasa eya ne, pakuuba konka ko Naile ku sukuulu wami...” Kechi ku sukuulu byonka byaubile bashanji ne; kechi nobe pulisiti ne, wafunjishiwa. Pakuuba mungyetu, amo mo ajinga mu sukuulu wa mamboawama wa Lesa Wabulume bonse, na kupembelela Kyambo kya Lesa; kechi byobya byalangulukatu jibumba ja bantu ne, kana byobya byaamba Lesa pa Kyokyo. Kabiji kimye Yoano kyo atajile mwiulu wamwene Mupashi kasa eya, waambile mba, “Ne amiwa na shimwine mba, awe ye Iye.” Oo, ami!

Akyo kyo kifulo kyobe kya bupopweshi. Akyo kyo kifulo kyobe kyakufyamamo. Awa ye Mwanamukoko wa Lesa ye ufumya bundengamambo bwa ba panontanda. Kechi kipwilo ne, kafwako mafunjisho abantu ne, nangwa kintu kikwabo ne, kanatu aye Mwanamukoko wa Lesa ufumya bundengamambo bwa ba panopantanda.

¹⁰⁶ Mwamona Yoano byo ekibikile nyi? Aye kechi waambile mba, “Anweba Bafaliseo muji bulongo, anweba Basanduseya, Bahelena.” Aye waambile mba, “Kuji Mwanamukoko.” Akyo kyo kifulo. Aye uji na Jizhina. Aye ye Iye. Kechi kujipo jizhina jikwabo muno Munshi ne!

¹⁰⁷ Monai byaambile Yesu na mambo akwa Yoano. Juba jimo Yoano watumine kwi Aye, na kumona kyo Aubilenga. Yesu waambile pe aye mba, “Aye wajinga kyokya kyeya

kikatampe kabiji kyasama,” mu kwibamweshwa jishinda jawama jo bakonsha kuyamo kwiya Kwanji kasa ku kyangye kufika, kwiya Kwanji kutanshi. Telekai bulongo. Kechi kimupitene kye. Yesu waambile mba, “Yoano wajinga kyokya kyeya.” Malakai 3, kafwako kilubo ne! Ngauzhi na kyokya kyeya kikatampe kyasama kya muyukile Yesu kwikala ye Yenka, “aye Mwanamukoko.” Bonse bakwabo banabamikoko bo baambilengapo ba mapulisiti, kabiji ne bintutu bikwabo, byajinga byabulama maana. Awe ye “Mwanamukoko!” Awa muntu wajinga na kyeya kikatampe kyasama, Yesu waambile mba byo aji.

Malakai 3 waambile mba, “Amiwa katuma muluwe Wami kulutwe Yami na kunengezha jishinda.” Kabiji awa watumina na kunengezha jishinda, wamuyukile Aye, kifulo. “Awa Iye! Kechi pajipo kilubo ne. Awa Iye! Namona kiyukilo kasa kibena kumulondela Aye. Amiwa nayuka mba awa Iye; Kyeya kwiya kufuma Mwiulu kasa kibena kwikala pe Aye.” Kyajinga kyaitabilwa, awa wajinga Aye.

¹⁰⁸ Nanchi, mulongo wami, Nasaka ku kwimpuzhako kintu kimo, mu kupezhako. Twakonsha kwamba kikye. Mu Malakai 4, bushe kechi twalailwa mpungu mukwabo, Mumbulungwa wa Kyeya kasa alondela, na kumweshwa kipwilo kyalubilamo jino juba amba Aye ye Bahebelu 13:8, “ujitu pamo keesha, leelo, ne myaka yonse”? Bushe kechi twalailwapo mukwabo kasa atumbuka kwiya kufuma mungye nenyi? Amena! Abo kine Bukine. Byo kyafikilamo ne kwendela pamo ne Luka 17:30, apo Mwaana muntu (Mpungu) po akesololanga Aye mwine mu kwalula bifulo byonse bikwabo bya bupopweshi ke byatutu, biji nobe madinaminesheni ne bikwabotu!

Lesu wasalulwile kifulo Kyanji. Yoano waambile mba, “Abyo byo Kiji!”

¹⁰⁹ Kabiji pano twalailwa kintu kimo mu jino juba, Malakai 4, “Kubwezhiwa kwa michima ya baana,” ne kwamba mba Aye kechi wafwa ne, abye bintu kechi bya mu nkulo ikwabo ne; lubatizhilo mwi Yesu mu Jizhina kechi lwajinga lwa kunyuma kokwa ne, pakuuba Aye ujitu pamo. Amena. Mu kwalula bifulo bikwabo bya bupopweshi ke byatutu, abyoyo byo akooba mpungu wa juba-jikapelako, mu kumweshwa mba byonse byashala ke bumbulwa maana, dinaminesheni ke kilubo, pakuuba ke kwibatongwela jibiji na kiyukilo kimo kyo Aubilepo, amba Aye ujitu pamo keesha, leelo, ne myaka yonse. Aleluya!

¹¹⁰ Ne apo, mu Lumwekesho 4:7, twajinga na Binyama byumi bina byo twapitamo.

Mutanshi wajinga, twatana kuuba mba . . . twatana, wajinga bokwe. Awa wajinga mutanshi Nyama mumi wayile na kukumanya makatazho a mu joja juba, Bokwe wa Kisaka kya Yuda.

Panyuma Yanji paishile Nyama mumi walondelapo. Kabiji twatana kuuba mba, walondelapo Nyama mumi wajinga ng'ombe, ye nyama mumi wa kikokoji, kitapisho. Mu mooba a kipwilo kyabena Loma, Kipwilo kyafwile; kitapisho.

Mukwabo walondejilepo, wajinga muntu, wajinga Nyama mumi wa kilungi kya muntu. Kabiji awa muntu wajinga wa booba bakingya bintu, kufunda kwa muntu, sukuulu wa mamboawama, ne bikwabotu.

Pakuuba Nyama mumi wapelako utumbuka, Nyama mumi wa kwiya, Baibolo waamba mba wajinga mpungu upita mwiulu. Aleluya! Kabiji ngauzhi waambile mba, mu jino juba, "Kukekala Kyeya." Oo, ami! "Mu joja juba kukekala Kyeya."

¹¹¹ Kwajinga juba ja bakingya bintu. Kwajinga juba ja jingatu kivule, ja kubula kutela mba mute nangwa bufuku ne. Bino mukimye kya mabaanga a bufuku, mu kimye kya Mpungu:

Ku kekala Kyeya mu kimye kya Mpungu,
Jishinda ja kuya ku Lukumo kine mu ke jitana
kutana;
Mu jishinda ja meema muji Kyeya leelo,
Kuzhikwa mu Jizhina jawama ja Yesu.
Banyike ne bakulupe, lapilai bubi bwenu
bonse,
Aye Mupashi Wazhila kine ukakubatizha
obewa ne ku kutwezhamo;
Mambo Kyeya kya mabaanga a bufuku kyaiya,
Kyo kintu kyakishika amba Lesa ne Kilishitu
bajitu Kimo.

¹¹² Amena! Kukekala Kyeya mu kimye kya mabaanga a bufuku, Kifulo kyasalululwa na Lesa kya bupopweshi. Oo, aye Mbila yayiya ku kika, kika Aye kyo akooba? Kabiji mu juba Janji kukekala Kyeya mukimye kya mabaanga a bufuku, kabiji (mu kuubaka?) mu kutambulwila baana Banji kubwela ku muzhi ku Ntanda ya kine ya mulaye, kupichila mu kiyukilo kimo kya Mambulungwa wa Mujilo awa watangijile baana ba Isalela kupita mungyetu.

Kifulo kyasalululwa na Lesa kyabupopweshi, Yesu Kilishitu. Akyo kyo kyonka kifulo kijiko. Ajo jo jonka Jizhina Lesa jo aji najo ja lupulukilo. Ajo Aye jo atela kisemi Mwiulu, byo kiji pantanda, ke Yesu Kilishitu.

¹¹³ Anweba kipwilo, Anweba bantu, mulunda ndengamambo, kechi muketekele mu kintu kikwabo ne kanatu Yesu Kilishitu. Kechi uketekele musapwishi uji yense ne. Kechi uketekele muntu umo amba akupulushe ne. Kechi muketekele mu kipwilo kiji kyonse ne, lufunjisho lwa kipwilo, dinominesheni uji yense ne. Ketekelaitu mwi Yesu Kilishitu, mambo Aye ye Kyeya kya kimye.

Twayai tukunyike mitwe yentu.

Kukekala Kyeya mukimye kya mabaanga
 abufuku,
 Jishinda ja kuya ku Lukumo kine mukejitana;
 Mu jishinda ja meema kyo Kyeya kya leelo,
 Kuzhikwa mu Jizhina jawama ja Yesu.
 Banyike ne bakulupe, lapilai bubi bwenu
 bonse,
 Aye Mupashi Wazhila kine ukatwela mukachi;
 Kyeya kya Mabaanga a bufuku kyaiya,
 Kyo kintu kyakishika mba Lesa ne Kilishitu
 baji Pamo.

¹¹⁴ Oo, mulongo, nyenga, inge ukyangye kulapila ne, inge kechi wabatizhiwa mu Jizhina ja Yesu Kilishitu ne, mwakonsha kutatula bufuku buno? Wakonsha kupana kwi Lesa jishuko ja ku kutambulwila mu kifulo mo wafwainwa ku mupopwela Aye nyi? Vulukai, pangye ya momwa, kechi kujipo kifulo akyo Lesa kyo alaile kyakukusambakenapo ne kukutambulwilapo mu bupopweshi ne.

¹¹⁵ Anweba mwamba mba, “Mulongo Branham, Amiwa mpopwela na bukishika!” Nanchi ne Kaina byo byo aubile. Aye wapaine musango uji yense wa mulambo Abela ye apaine, nangwa byonkabyo wajinga mulambo ungi. Obewa wafwainwa kuya ku kipwilo, ne kupana bya bujukumi, kabiji ne kuuba mwingilo obe nobe Mwinakilishitu byo afwainwa kuuba, kwikalatu wa bukishika nobe byakonsha kwikala mwanamulume ne mwanamukazhi uji yense.

Naimana kuno pa myaka sate, kuzhokoloka muzhi uno, na kubijika iye Mbila imotu. Amiwa mbeni kukoma. Amiwa kechi kekala nenu kimye kyabaishatu ne. Bino vulukai, pa Juba ja Buchibishi bwamambo, jiji jami jakompewa, kabiji jikamba kwi mushinina anweba.

¹¹⁶ Kujitu kifulo kimo akyo Lesa kyo abikamo Jizhina Janji, kabiji ne kyokyo kechi kipwilo ne, pakuuba mwi Yesu. Kujitu kifulo kimo kya bupopweshi, kifulotu kimo kya kutambulwilwamo, ne momo ke mwi Mutemwe, Yesu Kilishitu. “Kechi kujipo jizhina jikwabo muno Munshi ne, japewa ku bantu ne, mo bakonsha kupulukila,” kafwako kipwilo ne, kafwako mafunjisho abantu ne, kafwako nangwa kimo ne. Yesu Kilishitu!

Kabiji iye yafwainwa kwikala Mbila ya kimye, “Kwalulwila michima ya baana, kubwela ku Lwitabilo lwapainwe kala ku bazhijikwa.” Kechi mwakonsha kwi Kiswa bufuku buno nenyi?

Kabiji kimye kyo twakunyika mitwe yetu.

¹¹⁷ Kabiji boba bakeba kwibavulukako mu milombelo, mwakonsha kusutulako maboko enu. Kechi twakonsha kwita bantu kukitapisho ne, mambo twavujisha. Lesa emupeshe. Ami! Ku kipiko kyami, Naketekela mba kuji fili aduleendi.

118 Pano ku kilujo kyami, mwakonsha kusutulako maboko enu, ne kwamba mba, “Nasaka kuvulukwa.” Naketekela mba kuji aduleendi ne fifite, nangwa kukilapo, ku kilujo kyami.

Tuji na tabbanako kuno muji kizhiba kikatampe kya meena; kafunga, kafunga wawama, Mulongo Orman Neville, ne balunda, abo banabalume baji muno bo mubena kumona ne kusambakana. Pajuba pajuba, kila bufuku, kila awala, bantu bakeba kubatizhiwa, abo balapila, kimye kyonse kibena kupembelela. Kabiji umvwe mwakokela yuwe mukambizho, anweba mwashininwa, monka mwaila mulaye wa kwa Lesa, inge waikala wakishika mu muchima obe, kutambula lubatizhilo lwa Mupashi Wazhila.

119 Kujitu kifulo kimo kya bumpopweshi. Bino, akyo kechi kiji mu tabbanako ne. Amo ke mwi Kilishitu. Pano twakonsha kutwela byepi mwi Aye? “Konka ku Mupashi umo atweba bonse twabatizhiwa mu Mubiji umo.”

Twayai tulombe.

120 Mutemwe Lesa, ao maboko byo aji kusutulwa, kyakumweshi biji panshi ya kokwa kuboko mu muchima, ke kishinino kwakuuba mba kine babena kukeba bukwaso kufuma kwi Anweba. Amiwa ne balombelela bonse, Taata. Kabiji Amiwa nsakwambula Kyambo Kyenu. Anweba mwaambile mba, “Aye umvwa Kyambo Kyami, ne kumwitabila Aye Wantuma, uji na Bumi bwa myaka, kabiji kechi ukeya mu Kinje ne; pakuuba wapitaila kufuma kulufu kuya ku Bumi.”

Taata, kufumamotu mu muzhi milungu icheche yapitapo, na bwelele, naipwizhe, “Nga yuwe muntu?”

“Kika, baya.”

“Kyawama, pano nga . . .”

“Abo baya.”

121 Mutemwe Lesa, umo umo twaitwa, umo umo twafwainwa ku kumanya makatazho pa kwenda kupita mu mangawa a kivule kya lufu. Kabiji kyafwainwa kufikizhiwa pe atweba bonse, byo tuji ba mibiji ifwa. Bino, bufuku buno, Anweba mwitupa kukabila Kwenu, amba inge twakonsha ku ketekela mwi Aye kabiji ne kubatizhiwa mu Jizhina Janji, amba Anweba mwakonsha kwi tutwezha mukachi. Kabiji pano mu yuwe Mubiji, ye Mubiji wa Kilishitu, kechi mu kipwilo ne, pakuuba mu Mubiji wa Kilishitu, awa Mubiji wazhachishiwa kala. Kechi ukeya mu Kije ne. Lesa wiyitulwile bukaji Bwanji pa yewa mubiji, kabiji awa mubiji wakasuluka kufuma ku bubi; kabiji, pa kwikala mwi Aye, twakasululwa ku bubi, monka Mufuto Yanji byo etufwijile atweba. Kabiji monkamwa tuji na lumvwang’ano lwa bupopweshi umo ne mukwabo, kabiji Mashi a kwa Yesu Kilishitu, Mwaana wa Lesa, etulama ku bundengamambo ne mizhilulwila yonse.

122 Lesa Taata, Nalomba mba Anweba musakwibasenda bonse mu Bufumu Bwenu. Kiswishai kye, Lesa. Lekai kechi kwikalepo umo walubilamo ne; lekai kechi kwikale nsongwalume nangwa nsongwakazhi, mwanamuume nangwa mwanamukazhi ne. Nkambo, bamo bantu bami baikala muno, bufuku buno, abo bafuma munshi ya ooa Mashi. Byo Nakonsha kuvuluka bulongo byambo bya bataata! Kabiji Nalomba, Lesa Mutemwe, namba kafwako nangwa umo wa mwiabo wakonsha kulubilamo ne. Kiswishai kye, Nkambo. Amiwa ne muketekela Anweba, na byonse byo Nafwainwa kuketekela nabyo.

123 Endai pa balongo bami, banyenga, balunda nami, mu ino mpuzha bufuku buno kubikapotu ne bakwantakana kupichila mufoni. Makambi avula bingi abena kuteleka, kufuma ku Kitulu Kyamusela kufikatu ne Kumuzhika. Nalambo, Lesa Mutemwe, kuya kupita mu biselebwa bya kokwa ku Tucson, konse ku California, kuya ku Nevada ne ku Idaho, kuya kokwa ku Musela ne kuzhokoloka, kufika ku Texas; kimye alwe lwito po lwapewa, bantu baikala mu—mu bipwilo bicheche, mwa kumpopela manyi, manzubo, babena kuteleka. Anweba Lesa, lekai yewa walubilamo mwanamulume nangwa mwanamukazhi, nsongwalume nangwa nsogwakazhi, pa kino kimye, eye kwi Anweba. Kiswishai ponka pano. Twikipuzha mwi Yesu mu Jizhina, amba bantaane kifulo kya bukikizhi saka kukiji kimye.

Inge, twamona kuboko kwanemba pa lubumbulu, ntanda kasa iji mu bulubazhibazhi, kimye kya kupokololwa kyafwenya pepi. Lubaji lwa kyaalo kyetu lubena kwibila, lubaji lukwabo lubena kwenda ne kulajika na bitentanshi, monka Yesu mo alajile mba byo kikekala. Kechi kikale kyabanda kwi abo ne, Nkambo. Lekai be kitambule ponkapano, mambo twibapana kwi Anweba nobe michinya ya mbung'eno, ya Mamboawama, mwi Yesu mu Jizhina. Amena.

124 Bushe mwamuketekela Aye nyi? Lesa emupeshe. Baanga baketekela mba abo bo Bukine, ku lubaji lwami lwa kipiko? Sutulaiko kuboko kwenu. Baanga ku kilujo kyami? Sutulai kuboko kwenu. Lesa emupeshe. Mwaila Kumona kwami, bonsetu. Abo bo Bukine, balunda. Lesa wayuka mba akyo kine.

125 Pano mu kimye kyo tuji mwi Aye, kabiji byo tuji mwi Aye, anweba muji najishuko ja kutambula bintu byonse Aye byo afwijile. Kabiji ng'anyi bintu Aye byo afwijile? "Aye waashilwe na mambo a mizhilulwila yetu, wafumpilwe na mambo a bubi bwetu; Aye watambwile lukabisho lwa kwituletela mutende atweba, kabiji mo mu bipumo Byanji mo twabukilwa." Bushe mwaketekela kyokyo nyi? Bushe mwaketekela mu mfuto Yanji ya lubuko nyi?

126 Mujipo wakolwa mukachi ketu nyi? Lekai basutuleko maboko abo, ku kilujo nangwa ku kipiko. Mabumba akatampe a misongo. Amiwa kechi nakonsha kwita mulaini ne. Mwamona,

Amiwa kechi nauba...kechi bakonsha kwiya kuno ku pulatifomu ne. Kechi pajipo jishinda ja kwikyubilamo ne.

Baji na mbung'eno ya milombelo mu mampuzha akwabo, ya bakolwa, mu bipwilo ne bintu bikwabo, monka mu tabbanako.

Amiwa mbena kwi mwipuzhapo kintu kimo. Baanga baitabila bajiiko? Sutulai kuboko kwenu. Kijitu bulongo. Amiwa mbena kwimwambwila Kyambo, akyo kiji ye Kilishitu. Yesu mwingilo wanji wakupelako ku ntanda, kabiji ne ku Kipwilo, nangwa byonkabyo, Aye waambile kikye, "Abye biyukilo bikebalondelanga baitabila; umvwe babika maboko abo pa bakolwa, bakakosa." Baanga bayuka mba akyo kyakine, Mako 16, ambai mba, "Amena." [Kipwilo kyaamba mba, "Amena."—Waku.] Kijitu bulongo. Amiwa ne mwipuzha nobe waitabila amba mubike maboko enu pa muntu umo uji kulutwe kwenu. Bikaitu maboko enu pa muntu umo uji kulutwe yenu, kabiji lekai umo alombelele mukwabo. Bikai maboko enu pa muntu umo uji kwipi ne obewa.

¹²⁷ Nkambo, kuno kulutwe yami kuji kibokoshi kyatutambala, bintu bicheche; maama umo mukulumpe walala kuntu kumo, ubena kufwa, mwaana ujitu pepi nakufwa, bantu bakolwa konse konse. Tutanga mu Baibolo mba basendele kufuma ku mubiji wa kwa Paulo tutambala ne maepulo, kabiji bya bikilwe pa bakolwa; kabiji mipashi yatama, ne mipashi ya bubipisho, ne misongo, ne bikola, byafumine pa bantu. Bino, Nkambo, twayuka mba atweba kechi twi Paulo Wazhila ne, bino twayuka mba Anweba mukijitu Yesu, kyo kyonka kifulo kyanengezha-Lesa kya bupopweshi. Kabiji pano, leelo, abo bantu basolola lwitabilo lwabo lumo, nobe baitabila byonka byauble booba bantu. Kyakine Anweba mwibalengela jishinda! Kabiji Nabika maboko ami pa tutwe tutambala kabiji nalomba mba bikola ne byalumanamo bifume pa mibiji ya baabo bantu pa kabikwa bibye mu Jizhina ja Yesu Kilishitu.

¹²⁸ Bino, twafunjishiwa, amba Isalela byo afuminenga mu Ijipita, kasa baji mundoonda ya mwingilo, bajinga mujishinda jabo kuya ku ntanda ya mulaye. Aka Kalunga Kachila kakilang'enyene mujishinda jabo. Kabiji Lesa watajile panshi kupita mu Mumbulungwa wa Mujilo, kabiji kalunga kaumvwine moyo, kefungile kuku ne kuku, ne kuleka Isalela kupita kuya ku ntanda ya mulaye. Anweba Lesa, talai panshi kupita mu Mashi akwa Yesu, bufuku buno, kabiji lekai misongo ifunge kuku ne kuku, kabiji Satana apangiwemo. Kabiji lekai bantu bapite kuya ku bumi bwawama ne bulume, amba Lesa waambile mba, "Kukila pa bintu byonse, Nakeba mba mwikale na bumi bwawama."

¹²⁹ Pano Anweba byo mubena kumona, Nkambo Yesu, maboko a baabo bantu abikwa pa bakwabo, babena kumwesa lwitabilo lwabo, amba Anweba mwaambile mba, "Abye biyukilo

bikebalondela baitabila.” Babena kwi lombelela mu mashinda abo bene, umo ne mukwabo. Muntu walondelapo ubena kwibalombelela.

¹³⁰ Pano, Nkambo, alwe lukatazho lwaubiwa, amba Satana, nshabubela mukatampe, kechi ujipo na nsambu ya kukwachijila mwaana wa kwa Lesa ne. Aye ke kintu kyashindwa. Yesu Kilishitu, kifulo kimo kijiko kya bupopweshi, jo jonka jimo Jizhina ja kine, wamunshijile pa Kalvali. Kabiji twalomba Mashi Anji ponka pano, amba Aye wanshijile misongo yonse, bikola byonse.

Kabiji Nakambizha Satana kufuma pa jino jibumba. Mu Jizhina ja Yesu Kilishitu, fumamo mu baabo bantu, kabiji bekale bakasuluka.

¹³¹ Muntu yense wakonsha kuswa lubuko lwabo monka mo kyanembelwa Kyambo, pana lushimuno lobe monka mu kwimana nkobe ne kwamba mba, “Amiwa pano natambula lubuko lwami mu Jizhina ja Yesu Kilishitu.” Imanaiko.

Lutakaiko lwikale kwi Lesa! Abyo byokiji. Monai kuno, bilema ne bintu bikwabo bibena kwimana. Lutakaiko lwikale kwi Lesa! Byokiji. Anweba ketekelaitu. Aye uji muno. Byo kyawama!

¹³² Anweba mwabula mu jibumba, muji pangye, kupichila mu mawaya, mwafwainwa kumona! Nalanguluka mba muntu yense uji muno, monka mo Nayukila, nobe bavula ba mwiabo, baimana pa kino kimye. Oo, ke kimye kyawama bingi! Akye Kyeenyi kya Nkambo, akyo kyo kika! “Paji Kyeenyi kya Nkambo, pekala bwanabwabene, pekala kukasuluka.” Aye Mupashi wa Lesa witukasulula.

¹³³ Pano Aye byo etubuka atweba, twikiketekela. Aye witupulwishe; twikiketekela. Abo babena kukeba kubatizhiwa, kizhiba kyanengezhiwa. Kimye kiji kyonse, awala uji yense po mwakonsha kukebela kwiya, kukekala muntu umo wa kupana bukwasho.

Kabiji pano Nalanguluka mba, kasa tukyangye kushika ne, twafwainwa kwimba lwimbo wakala wa kipwilo. “Namutemwa Aye, Namutemwa Aye mambo Ye mutanshi kutemwa.” Tusutuleko maboko etu kwi Lesa kabiji ne ku mwimba na michima yetu yonse!

Tubena kukeba kwimukumanya muno lukeelo kelo, pa naini-sate, kyonka kino kishimikwa kimo, mambo a mutwe wa *Masongola Ne Kwikana*. Kijitu bulongo.

Twayai tumwimbile pamo.

Amiwa namutemwa Aye,

Lekai jije jibumba jikatampe jimbe kyokyo ponkapano! Ne anweba kupichila mu mawaya, mwimbai, ne anweba.

Mambo Aye ye mutanshi kutemwa
 Kabiji wapotele lupulukilo lwami
 Pa kichi kya ku Kalvali.

¹³⁴ Kwepi ko kyaubiwe? Pa kichi kya ku Kalvali. Kimye kyo tubena kumwimba jibiji, Nakeba mba obewa wimune muntu umo uji kwipi ne obewa, ne kwamba mba, “Lesu akupeshe obewa, mwenyi.”

Na... (...?...)
 Mambo Ye mutanshi...
 Kabiji wapotele lupulukilo lwami
 Pa...

¹³⁵ Oo, Aye kechi mwamutemwa nenyi? Bushe Aye kechi wawama nenyi? Bushe Aye kyo Kifulo kyenu Kyakufyamamo nyi? Aye jo Jibwe mu ntanda ya kunkoka, yo Nzubo mu kimye kya kimpupu, kyo kyonka Kifulo kyabukikizhi kyo Nayuka. Onkao mambo:

Lwitabilo lwami lubena kutala kwi Anweba,
 Anweba Mwaanamukoko wa ku Kalvali,
 Mupulushi wa Bulesa;
 Pano ng’umvwai mu kimye kyo Mbena
 kulomba,
 Mfumyai kuzhatwa kwami konse,
 Ndekai kufuma ku ja leelo
 Ngikale Wenu yense!

Twayai tusutule maboko etu byo tubena kwimba.

Lwitabilo lwami lubena kutala kwi Anweba,
 Anweba Mwaanamukoko wa ku Kalvali,
 Anweba Mupulushi wa Bulesa;
 Pano ng’umvwai mu kimye kyo Mbena
 kulomba,
 Mfumyai bubi bwami bonse,
 Oo ndekai kufuma ku ja leelo
 Ngikale Wenu yense!

Twayai tukunyike mitwe yetu kimye kyo tubena kunyinyita.

Kimye bumi bwami kyo Bubena kwenda
 mumashinda avula afinshi,
 Kabiji bulanda bwazhokoloka,
 Anweba Ikalai Tangi wami;
 Nfumyai finshi ja leelo,
 Nfumyai bulanda,
 Nangwa kundekelela ngye mungi
 Kufuma kwi Anweba ne.

Kimye kyo twakunyika mitwe yetu, kafunga wetu wawama, Mulongo Orman Neville, usa kupalang’anya jibumba.



KIFULO KYABUPOPWESHI KYASALULULWA NA LESA KDE65-0220

(God's Chosen Place Of Worship)

Ino Mbila na Mulongo William Marrion Branham, yalupwilwe patanshi mu Kizungu pa Kibelushi mabaanga abufuku, 20 Kubomukata, 1965, pa Parkview Junior High School ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org